

四庫全書

史部

欽定四庫全書

欽定石峯堡紀畧卷十八

八月十八日辛丑軍機大臣奏言竊照甘省回匪
田五糾同李可魁等聚衆謀逆田五殲斃後賊黨
張文慶等復四出擾害仰蒙

皇上特派大學士公阿桂陝甘總督福康安先後帶領
巴圖魯侍衛章京等前往督辦勦捕逆匪首夥各
犯擒戮無遺經阿桂福康安等將緊要應訊賊首

張文慶馬四娃賊目楊填四賊夥馬良茂馬金玉
馬建成馬壯馬幾並田五之兄田友李可魁之父
李自黨及始而從賊攻城搶鎮繼而投出之武舉
馬文熹等分起押解前來

皇上親加鞫訊復

命臣等逐一研詰緣已斃逆回田五並現獲之張文慶
即張阿渾俱係馬明心之徒張文慶又係馬明心
妻侄田五借復馬明心邪教為名蓄意謀逆於本

年二月間同伊徒李可魁及李可魁之父李自黨等訂於五月初五日分頭起事李自黨李可魁潛約老鴉溝回子馬化保等三十一人入夥因被李應得等告發田五等遂先於四月十五日在小山率衆搶掠西安堡田五分居胞兄田友未經隨往即被拏獲當經已革提督剛塔帶兵前往勦捕於狼山遇賊打仗田五腹中鎗傷自刎身死賊黨李可魁等竄入馬家堡旋被官兵追勦賊衆翻山夜

適張文慶在通渭縣草茅溝糾約已經正法之吳進寶等十三人入夥因被縣役張金查捕將伊子挈獲送縣該犯即率衆逃入石峯堡隨後馬四娃即大通阿渾自馬營挈眷會集回衆踵至堡內張文慶又糾楊填四入夥楊填四轉糾馬金玉並已經正法之吳忠德等九人入夥李可魁自糾約馬建成馬良茂等所在附近村庄回民俱脅令入夥不從者即加殺害維時馬見幾及馬金玉之父馬

壯先各携家口避匿嗣經逼脅上山訊未隨同打
仗張文慶隨令楊填四等帶領千餘人至通渭縣
索討伊子並肆行焚搶放出監犯馬金玉亦隨同
攻城張文慶自在鹿鹿山扎營接應而李可魁等
於翻山竄逸後困守馬營監尋被官兵尾追亦逃
往鹿鹿山會合屯聚滋擾伏羌秦安各州縣雖屢
經官兵截殺賊衆尚復窮竄滋蔓而馬文燾以靜
寧州武舉居住底店當楊填四等糾其入夥時馬

文燾即率底店數百戶為賊營辦送糧食且四出
搶掠村鎮攻犯州城我

皇上指示機宜

特命阿桂福康安抵甘先將底店賊匪勦淨再行進抵
石峯堡設法攻圍福康安仰秉

睿謨帶兵前進底店馬文燾見官兵勢大先至軍前投
出曾不數日底店賊匪勦淨盡復抵石峯堡四
面設卡圍堵絕其水道有投出之馬見幾復進賊

巢與馬建業楊填四馬良茂立誓擒獻賊首自効
楊填四旋復翻悔告知馬四娃轉將馬見幾看守
欲行殺害張文慶等復思奪路奔竄經馬見幾先
令伊家口逃出告知官兵即乘其領衆撲出盡力
殲殺旋復竄回隨于初五日黎明督率各官兵一
湧而上進堡搜捕將首逆張文慶馬四娃賊目楊
填四馬建成馬良茂馬金玉等悉行擒獲殲捕賊
回二千餘名挈獲首夥各犯眷屬共三千餘名口

除審實逆情即於該處正法分別辦理外將為首
緊要及應質人犯張文慶等先行解送前來連日
嚴訊之下各犯供吐前情不諱臣等以回民自其
祖先以來蒙

國家覆載厚恩

皇上因甘省地瘠民貧尤加意賑恤各回民同有天良
自當深知感激回匪張文慶等何以自外

生成甘心謀逆從前蘇四十三與馬明心倡立邪教聚

衆滋事當經勦滅各回民尤應共知儆戒且石峯堡屢經修葺自屬造謀已久帳房器械及堡中糧食亦必係預先製造囤積至該犯等如果聽從田五為馬明心報讐圖復邪教則當田五殲斃之後該犯等因何不畏懼解散敢於率衆攻城肆行焚掠恐此外另有主謀為首之人且馬文燾係靜寧州武舉身有頂帶為衆所推當賊匪到底店糾其入夥時馬文燾理應率領回民與之抵禦乃反為

辦送糧食本庄不足又於附近村鎮擄掠送給更助賊人攻犯州城關廟是其心蓄逆謀定非一日

臣等將該犯等逐一反覆究詰據張文慶馬四娃

供從前蘇四十三經官兵勦殺掌教馬明心亦已正法此事原因與舊教爭教而起舊教是我們新教讐人今年田五在小山起事前聽見說是舊教回子舉首所以我們立誓要與他讐殺後來聞官兵追捕就逃往石峯堡藏躲堡子向係大馬家修

葺實不是我們修的所用斧子剪子庫刀都是村
庄上搶來後在高廟山又搶得些鎗刀軍器帳房
係蔡家堡當舖內搶得布疋做的糧食是沿途搶
掠來的並非預先囤積我們人又少糧又短在堡
裏不過得活一天多延一天性命至我們起事先
前田五為首田五死後就推張文慶為首馬四娃
為副實沒另有為首之人等語據李自黨供田五
起事時我聽見兒子李可魁說原是為馬明心報

讐後來傷了官兵搶了城堡見事情已經鬧大在
底店又告訴我說如今不如起勢鬧去萬一鬧得
成功豈不更好等語臣等又以李自黨業據供認
於田五等謀逆時伊實知情其楊填四等自必有
預商謀逆情事各加嚴究詰訊據楊填四供我係
張文慶於五月初間帶領多人將我裹上山去張
文慶馬四娃派我同馬尚德馬廷海帶領千餘人
去攻破通渭縣城先前實不認得張文慶們又據

馬金玉供五月初六日楊填四把我糾上石峯堡
派我管糧初八日實止跟隨攻打通渭縣城一次
馬良茂供五月十一日李鬍子馬鬍子糾我上山
曾在鹿鹿山隨馬四娃打仗一次又據馬建成供
五月初七日李鬍子逼我上山派我巡壕並沒有
打過仗馬壯供五月初間李鬍子裹我上山後見
官兵到了就投首出來的又據同供我們與張文
慶們素不認識都是被裹上山實無預先商謀的

事等語據馬文燾供我住居靜寧州底店中過武舉本年田五起事在狼山被官兵烏鎗打死其餘回人逃往馬營官川等處五月十九日石峯堡賊人馬鬍子楊填四馬金玉等到底店來要我入夥我那時恐其殺害家口應許了他們原想等官兵到來再作計較當日馬鬍子楊填四等都散了退到離底店不遠的紅山上扎營官兵到時我寫了稟帖率衆首先投出等語復提出楊填四馬金玉

詰以糾約馬文燾入夥後馬文燾如何替你們辦
送糧食搶掠付鎮攻犯州縣令其與馬文燾當面
質對馬文燾始猶不吐繼見衆証確鑿始據供出
楊填四等在紅山扎營每日都是我們底店人運
送牛羊糧食後因本庄不能供給領了衆人到附
近之通邊轉嘴鎮搶掠糧食送給通邊鎮上有我
的相好薛岱是我預先吩咐衆人不要到他家搶
掠轉嘴鎮有我的讐家孫高舉是我帶去的底店

人馬六十子將他殺了至於楊填四等攻犯靜寧
州城時我扎營在南山娘娘廟前因聽得官兵將
到底店我勸他們撤了靜寧州回到底店保護村
庄至小山田五我平日並不認識我也不會念經
並非阿渾等語反覆究詰矢供如一臣等伏思率
土編氓均受

皇上深恩厚澤甘省回民食毛踐土百數十年實與齊
民無異該犯等乃敢潛造逆謀聚衆焚搶實屬人

神共憤覆載難容查律載謀反大逆但共謀者皆
凌遲處死等語除首逆田五及黨惡李可魁等已
伏冥誅業經剉骨揚灰外張文慶馬四娃糾約新
教回匪聚集石峯堡四出滋擾抗拒官兵實屬罪
大惡極雖寸磔不足蔽辜楊填四聚集多人入夥
攻城焚搶縱放罪囚李自黨與伊子李可魁同預
逆謀又隨同打仗均屬同惡相濟馬文燾身為武
舉膽敢倡率衆人為賊營運送糧食助攻州城而

其搶掠通邊轉嘴鎮係伊一人主謀並非為賊所脅且其供內并有報復恩仇之語後見賊人氣喪官兵勢盛始於軍前投出是其心懷兩端險惡狡詐實屬不法已極張文慶馬四娃楊填四季自黨馬文熹均合依謀反大逆律凌遲處死該犯等父母妻子兄弟叔姪不限籍之同異除已經阿桂等查明正法外應行令陝甘總督再詳細查拏照例緣坐毋致一名漏網馬良茂隨同李可魁入夥在

鹿鹿山隨馬四娃打仗一次馬金玉聽從楊填四
入堡亦隨至通渭打仗一次馬建成隨李可魁上
山為賊巡壕田友係首逆田五之兄例應緣坐馬
壯係逆黨馬金玉之父曾被脅上山以上五犯雖
起事均未共謀但已隨同入夥即屬黨惡俱應擬
斬立決以示懲創馬見幾被脅上山於官兵甫抵
石峯堡即思擒獻賊首追賊人欲於黑夜潛逃又
密遣家屬投出通信官兵隨進逼賊巢即將首逆

張文慶馬四娃等拏獲但已經入夥未便因其送
信投出徵勞遽令倖免亦應一例擬斬立決奏入
上諭內閣曰張文慶馬四娃李自黨楊填四馬文熹俱
著即凌遲處死馬良茂馬金玉馬建成俱著即處斬
至向來逆案緣坐人犯經法司按律擬以斬決具奏
者朕每加恩改為監候此次賊回竟敢預蓄逆謀聚
集多人傷害官兵攻掠城堡實屬罪大惡極所有首
逆田五張文慶馬四娃等名下應行緣坐者無論男

女長幼自應概予駢誅其從逆賊匪名下緣坐各犯
男丁十三歲以上者亦不可復行存留田五之兄田
友馬金玉之父馬壯並著即行處斬其馬見幾一犯
先經從賊本當一併正法但念該犯於官兵甫抵石
峯堡即先行投出欲將首逆張文慶馬四娃擒獻迨
復回石峯堡於賊人商謀黑夜潛逃時馬見幾又遣
伊家屬到營密稟官兵得先為預備將賊匪痛加殲
戮并將張文慶馬四娃按名生擒械送熱河審明盡

法懲治尚有一綫可原馬見幾著從寬免其一死永遠牢固監禁遇赦不赦餘依議

二十日癸卯

上命軍機大臣傳諭福康安曰前據福康安奏馬建業供單內稱伊兄馬見幾眷口俱在靜寧州監禁等語現在福康安作何審辦之處查明覆奏至馬建業一犯雖據馬見幾供稱初五日官兵攻進石峯堡時曾幫同將首逆張文慶等擒獲但該犯先已從賊未便

因其兄業經免死概從寬宥並著福康安將馬建業如何辦理之處一併覆奏

同日福康安奏言查守備池清遇賊接仗失利兵有損傷一事

臣

傳該守備嚴加究詰據供四月十

五日田五起事剛提督派我帶了五百固原兵前往靖遠接應高人傑十八日到了海城叅將李良輔將我的兵留下三百名防守海城我帶了二百兵前往靖遠二十二日已刻路過馮家園地方忽

遇賊匪五百餘人從山溝內持械撲出我就帶兵
與賊接仗因兵少賊多不能抵禦陣亡了六十人
其餘兵丁即上山梁站住拋擲石塊施放鳥鎗將
賊擊打賊始退去我就帶領餘剩官兵赴劉家井
大營見剛提督是實等語臣查守備池清雖據供
並無遇賊退走情事但係一面之詞難以憑信恐
不無畏罪捏飾情弊隨將原領之把總外委以及
旗隊目兵晁選等傳集隔別訊問切實跟究與池

清所供相符應否免其治罪之處恭候

欽定奏入

上命軍機大臣傳諭福康安曰據福康安查奏守備池清於馮家園地方忽遇賊匪五百餘人撲出池清帶兵接仗陣亡兵六十名其餘兵丁即上山梁站住擲石放鎗將賊擊退該守備帶領餘剩官兵赴趙家井大營並無退走情事等語該兵丁等站住山梁時是否池清親自帶領上山抑係兵丁各自上山站住池

清究竟身在何處福康安所奏情形尚未為明晰况
賊匪不過烏合之衆池清帶兵二百名雖遇賊五百
餘名亦何至不能抵禦即使查無退走情事亦止當
免其一死豈可復令忝列戎行已將奏到之摺交軍
機處存記著傳諭福康安再向池清嚴切究詰該兵
丁等上山站住時該守備是否帶領上山究在何處
詳晰據實具奏俟奏到另降諭旨

同日福康安又奏言

臣

據甘肅布政使浦霖詳稱

查得逆回攻擾通渭時有該縣原任四川威遠縣
知縣李南暉因病告休在籍一聞賊警即帶領子
侄家丁督率民夫上城協力守禦迨縣城失陷該
員仍罵賊格鬪遂為所害其子貢生李思沆同時
被殺伊侄監生李師沆亦即投繯殞命賊人將其
家室焚掠一空嗣經伊子貢生李宗沆呈報署縣
黃恩轉詳該府何文耀覆查屬實臣伏查逆回不
法鴟張敢於攻犯城邑實屬士民共憤該員曾登

仕版尤切同仇率衆守城原屬分內應為之事惟
是賊氛方熾之時該縣知縣王懷尚且覲顏苟活
而在籍之員獨能禦賊捐軀且父子及姪同時殞
命殊堪憫惻自應據詳

奏明仰懇

聖恩量加

賜卹以示獎勵

福康安又奏言前奉

諭旨帶眷投案之回民馬世雄又舉首田五謀逆之李
應得等四人令臣拔補千總作為嚮導並揀選一
二人送部引見查李應得等三人前經傳至軍營
優加給賞伊等俱情愿進京引

見瞻仰

天顏已令回家收拾過便送部至大莊回民馬世雄於
賊匪至莊糾約入夥時携眷赴通渭縣城首告五
月十一日賊回攻破縣城被賊殺害情尤堪憫現

將伊子馬得榮給予把總頂帶並賞給銀兩以示
優卹均奏入

上諭內閣曰通渭當賊人滋擾時該縣知縣王懷尚覲
顏苟活李南暉以致仕在籍之員竟能率領子侄家
丁督同民夫守護城池追賊匪進城復格鬥捐軀父
子暨侄同時畢命深堪嘉憫李南暉著加恩賞給知
府職銜並著該部卽照知府陣亡例議給卹廕又前
據剛塔奏大莊回民馬世雄於賊匪至莊糾約入夥

時攜眷赴通渭縣城首告業經降旨將馬世雄拔補千總茲據福康安查奏馬世雄已於賊匪攻破縣城時被賊殺害現將伊子馬得榮給予把總項帶並賞給銀兩等語馬世雄不肯從賊且赴縣舉首以致為賊戕害情亦可憫伊子僅賞給把總項帶尚覺稍輕著福康安即將馬得榮拔補千總以示獎勵

同日福康安又奏言臣暫駐固原州離靜寧不遠所有各州縣解到賊匪劉五六子等五十三名臣

率同陞任按察使陳步瀛嚴加究訊或隨賊攻城
或抗拒官兵或擾害村庄肆行搶刦或聽從糾約
入夥或賊匪經過被脅隨行俱各供認不諱查劉
五六子等四十八名俱係從賊匪犯又應行緣坐
犯屬賢一倉等五名理應即正顯戮臣於審明後
即行按名正法奏入

上諭該部知之

福康安又奏言革職靖遠營外委李茂前於捏報

逃兵金鑑陣亡案內問擬斬候秋後處決今其胞弟李榮附從哈得成等謀逆業經拏獲正法查李茂曾任武弁其胞弟竟敢從逆不法情尤可惡該犯律應緣坐未便稽誅臣已飭司提出省監即行處斬奏入報

聞

二十六日巳酉軍機大臣奏言

臣等遵

旨詢問額爾登保據稱我於七月十五日奉派同和倫

由石峯堡帶兵至馬家河幫同副將趙繼鼎搜索賊匪十六日行抵該處趙繼鼎不在營內聞說往高家灣搜尋賊匪去了十七日至青梁山遇見該副將聞知馬家河回匪從賊者原有四五十人七月初十日該副將派外委趙宗先前往搜索賊匪等聞信欲逃被該處地保攔阻賊匪將地保三人殺害並同該處回民男婦大小一百餘名齊上空堡以為抵禦之計趙繼鼎們初十一十二攻打

了三日沒有打開十三日纔打開堡子賊匪就竄
往高家灣地方所有堡內剩下回匪當經趙繼鼎
等殺死有逃至紅土窪者亦經順道擒戮又追至
高家灣與賊打仗外委趙宗先於該處陣亡我十
五日至馬家河趙繼鼎已將高家灣賊匪辦結止
剩下三十餘名逃往官川一帶我於十七日帶兵
同趙繼鼎前往搜拏殺死賊匪十一名等語臣等
查馬家河回匪既齊上空堡抵禦官兵殺害地保

並外委趙宗先誠如

聖諭未便以為脅從置之不辨但額爾登保所稱情形
係趙繼鼎轉向告稱並未目覩臣等復將福康安
原摺與刑部議覆核對俱屬相符奏入

上命軍機大臣傳諭福康安曰本日據刑部核擬阿桂
福康安叅奏洮泯協副將趙繼鼎治罪一摺細閱摺
內有外委趙宗先前往馬家河拏賊時賊匪聞信欲
逃被該處地保攔阻賊匪將地保三人殺害並逼脅

回民男婦大小一百餘人齊上空堡以為抵禦之計
等語回民既上堡抵禦官兵即與從逆無異不得復
稱為良民因傳詢額爾登保亦據稱回匪由馬家河
搬入堡內經趙繼鼎等攻打三日始行打開等語回
匪等屯集堡內若非齊心抵拒豈能固守至三日之
久況賊匪凡經官兵拏獲者無不自稱為被賊脅從
以圖末減即如張文慶馬四娃馬文燾等尚有為李
鬍子裏脅上山之供豈可輕信且外委趙宗先及地

保人等俱因挈賊被害是馬家河回匪竟敢聚衆拒捕傷害官兵情節斷難寬宥趙繼鼎之殲戮多人不得謂之波及無辜其失不過未取親供即行正法以致於此然罪尚不至於發遣伊犁況斬罪乎著將刑部摺內折角處及詢問額爾登保奏片交福康安閱看令其將馬家河回人究竟曾否幫賊拒捕之處詳細查明據實具奏此事關係趙繼鼎生死出入福康安係公正之人自不肯迴護前奏也

九月初五日丁巳

上諭內閣曰甘省逆回案內革職通渭縣知縣王懷於
縣城失事時躲避倉房不能守城殺賊効節捐軀據
刑部定擬斬決請卽於該處正法經朕特降諭旨令
阿桂等將該犯解至行在審訊今據福康安委員將
該犯解到當交軍機大臣會同行在刑部訊取供詞
進呈朕復親行廷鞫加以杖夾令其羞辱該犯於原
叅各款不能復置一辭著卽將該犯明正典刑以彰

國憲方逆回滋擾通渭縣城時該縣典史溫模以佐雜微員尚能自縊身死紳衿李南暉係告休在籍知縣亦能慷慨同仇率其子侄奮身巷戰追勢屈力窮與子侄同時殞命經該督奏聞朕即加恩均予格外卹廕王懷以現任縣令且係進士出身讀書明理豈不知城存與存城亡與亡為古今通義乃始則將張文慶之子張太及掌教張樂等從城中放出予賊繼復藏匿倉房賊退後逡巡復出是其忍恥偷生設使

賊人向伊逼脅伊必頻首降賊豈能如溫模之義激
投繯李南暉之挺身罵賊乎似此覲顏喪節實為忝
竊科名貽羞民社於世道人心大有關係其罪實不
止於失守城池也且該犯一念貪生希圖苟延性命
殊不知死則沒有餘榮生則身遭顯戮一榮一辱取
決湏臾況逆回攻城係在本年五月王懷即苟活偷
生亦不過暫延數月仍正刑誅又何不為溫模李南
暉之取義舍生榮邀恤典耶如此貪生忘義之人即

身受重辟尚不足蔽辜其子孫如有業經出仕及現
為舉監生員者俱著即查明斥革永不許登仕版夫
激濁正所以揚清朕固不為已甚此非牽牛蹊田奪
牛罰重也其知縣李南暉已給與知府卹廕典史溫
模前已勅部議恤著加恩賞給知縣職銜仍着該部
照知縣例議予恤廕以示善善從長賞延於世之意
朕辦理庶務一秉大公其能死事者必優予恤廕恩
及後嗣而於遇賊恇怯畏死倖生之徒則不但本身

重加懲治並且罰及子孫所以勵名節而儆官方刑
賞俱視其人之自取至此案內逆回滋擾處所之各
該地方官張廷桂等或藉病玩延或平時失察各有
應得之罪然不如王懷之無恥偷生並着軍機大臣
會同刑部按律嚴審定擬以蔽其辜將此通諭中外
知之

臣等謹案縣令有守土之責一旦有事與城存
亡所關綦重非獨職司民社實義凜綱常也王

樓身任知縣曾忝科名其於古今大義如張巡
許遠之事寧不知之乃當通渭失守時避賊藏
匿忍恥偷生隳_臣節而負

國恩實為法所難宥至典史溫模紳衿李南暉或投
繯畢命或巷戰捐軀乃臣子分所宜然我

皇上秉大公以激揚於王樓之醜顏倖免罔顧名義不
惟身被顯戮且罰及子孫以樹大防而垂炯戒
其盡節之溫模等並優加卹廕善善從長刑賞

重輕悉視其人之自取伏誦

聖訓炳若日星洵足為萬世名教之準歟

初十日壬戌福康安奏言查首逆田五於四月二十日率領衆賊撲攻靖遠該縣知縣黃家駒聞賊入境一面通稟一面即僱撥民夫搬運木石同委員候補通判吳廷芳吏目朱爾漢督率上城竭力守禦維時有督標遊擊富成帶兵六百名協同擊勦有靖遠兵丁范大全在南城鎗傷一賊未死令

民夫緹城擒上訊係田重交供出城內有哈得成
哈彥等內應該縣即密行約會在事文武暗傳兵
役挑選勇健民夫設計擒拏吏目朱爾漢即帶兵
役民夫往內應回民各家誘以上城陸續綁縛一
百三十八人次日又搜獲十九名俱行監禁陸續
審明正法賊知內應已獲於二十一日傍晚遁回
馮家園打喇赤等處又賊首張文慶率衆於五月
十九日撲攻伏羌縣城該縣向無額設弁兵知縣

楊芳燦於五月初間聞賊匪圍攻通渭即僱覓壯健民夫並挑選漢回紳士之能事者上城防守偵知城中有回民馬稱驥馬元驥馬中驥等欲為內應並經守城回民監生馬映龍出首該縣率領典史葛宗仁壯役馬增壽等合力擒拏該犯等持械抗拒當時中鎗身死者馬稱驥等四名其餘蘇王奇等十四名全行就獲審明正法並搜出刀矛火藥等物迨十九日賊至城下圍攻三晝夜該縣督

率民夫及回民鄉約白中偉等竭力抵禦鎗石斃賊百餘人至二十二日李侍堯剛塔等率兵到境連次打仗勦殺賊匪於二十四日始行竄逸又署靜寧州知州金縣知縣余躍龍於四月二十三日拏獲賊犯馬果能究出草茅溝張阿渾與田五通謀起事情節當即密查州城內回民有一百餘戶恐其勾結內應因挑選年力精壯回民四十餘名給以口糧分撥出城守卡並派夫役密為防範又

查所屬村鎮惟底店回民最多借放給口糧之便
傳該鎮回民掌教馬伯倫回子鄉約馬相寅扣留
在州差人看守嗣於五月十四日拏獲奸細楊五
十三訊係石峯堡賊人差令赴底店通信告知十
八日到底店入夥旋聞該鎮回民於十五日移住
山上即一面稟明臬司陳步瀛一面差傳武舉馬
文燾赴州面諭馬文燾堅不赴州二十五日馬文
燾率衆賊二千餘人至靜寧州城外翠屏山剽營

焚燒關廂攻圍州城該署州督率兵役上城防守
竭力抵禦施放鎗砲擊斃賊人二百餘名生擒馬
子倉一名正法賊匪攻擾三晝夜至二十七日始
行竄逸該署州前後拏獲奸細逸匪共四十五名
以上各情節臣留心體訪俱屬確實伏思州縣職
司民社遇有賊匪竊發攻擾城池率衆防護原屬
職分應為之事但該員等先事籌辦保守危城亦
有微勞此內靖遠縣知縣黃家駒已於失察哈彥

哈得成聚集禮拜寺謀逆一案衆奏革職涂躍龍
亦有失察馬文燾從逆之咎其功過兩不相掩可
否請

旨將涂躍龍楊芳燦黃家駒送部引

見量加獎擢之處出自

皇上天恩再署鹽茶廳同知敦柱於本年三月甫經到
任因盤查鄉倉等事未能在城四月十四日一聞
田五糾衆謀逆之信該處本係土堡又經坍塌敦

柱即自行捐貲上緊修理整齊並選募民夫督同
兵役上城防守田五起事見海城戒禦甚嚴不敢
攻擾選撲西安州土堡該署廳即帶領兵役前往
小山將田五之兄田友及犯屬六十餘名口悉數
擒獲又陸續拏獲逆回李可喜等六十三名俱經
前督臣李侍堯審明正法尚屬能事該員已於失
察田五起事案內同知府王立柱叅奏革職拏問
解交刑部治罪將來定案時可否仰懇

聖恩量為未減之處恭候

欽定至協同守城出力各員除吏目朱爾漢已經奉

旨送部引

見外所有遊擊富成守備趙邦選及奪回通渭縣城之

都司福德保岱什衣千總蘇朝候補通判吳廷芳

候補知縣陶廷珍保寧吏目李元龍典史葛宗仁

曾對揚相應奏明請

旨一併交部議叙以示獎勵再副將八十五因前次勦

捕鷹窩石賊匪未能悉數殲擒業經叅奏革職查該員於回匪起事時帶兵勦捕殲戮多人尚屬奮勉其擊散鷹窩石賊匪後即奉前督臣李侍堯檄調令其帶兵速至軍營與玉柱之專委搜捕餘匪者不同且該員年力精壯熟識營務合無仰懇聖恩將該員留於甘省差遣効力俟將來遇有都司缺出酌量題補則該員感激

天恩愈益奮勉而甘省得一熟練之員於營伍亦屬有

裨奏八

上諭內閣曰涂曜龍楊芳燦及革職之知縣黃家駒俱著送部引見富成趙邦選福德保岱什衣蘇朝吳廷芳陶廷珍保寧李元龍葛宗仁曾對揚俱著交部議叙八十五著留於甘省交福康安差遣委用遇有都司缺出酌量題補

同日福康安又奏言竊照逆匪馬四娃其原籍大通住居兄弟及伊繼父繼父之子前經

臣

密飭西

寧府巴海查拏茲據該府縣等選派幹役將各犯解送前來臣率同陞任按察使陳步瀛提集案犯逐加研訊緣馬四娃本係回民蘇大明之子過繼與回民馬良賓為子馬良賓又生有二子馬正孝馬正福該犯馬四娃本生父母俱故兄弟蘇旺福等六人該犯於乾隆四十一年出外謀生即在馬營教授回經總未回籍本年五月遂與張文慶糾衆起事臣恐馬良賓蘇旺福等與馬四娃有往來

勾通情事嚴訊馬良賓堅供馬四娃出外多年久
不見面馬營至大通干有餘里實不知有謀逆情
事又據蘇旺福等堅供馬四娃自過繼馬姓之後
久絕往來實不知伊在外謀逆等語加以刑訊矢
口不移臣思馬良賓蘇旺福等如果知馬四娃在
外糾衆謀反即使大通相隔遙遠未能潛赴賊營
亦必慮及牽連緣坐預行逃避斷無靜候查拏之
理所供似無遁飾查馬四娃聚衆謀逆為石峯堡

賊首實屬罪大惡極所有該犯繼父繼父之子及
本生兄弟俱應概予緣坐以昭炯戒臣於審勘後
即委按察使陳步瀛會同臣標中軍副將王彙將
馬良賓馬正孝馬正福蘇旺福蘇旺木海木賽乙
的里七名綁赴市曹按名正法訖該犯三兄蘇旺
成業經飛咨伊犁將軍查拏俟解到續行審辦其
各犯婦女幼孩統候併案發遣所有馬四娃祖父
坟墓現飭該地方官剗挖剗骨揚灰

福康安又奏言鹽茶廳所屬小山地方為逆回田五起事之處嗣即攻破西安州土堡由裴家堡松栢子崖永安堡板窑溝柴薪梁新寨溝小紅溝一帶搶掠村庄遂至靖遠縣城外約會糜子灘賊匪攻撲一晝夜遁回馮家園打喇赤狼山與官兵相遇接仗田五中鎗自戕餘黨自馬營水竄至官川勾結從逆回匪復行蔓延又在馬家堡設計翻山遁逃竄聚石峯堡肆行滋擾彼時賊踪所過地方屢

奉

恩綸撫卹普蠲本年錢糧又豁免歷年積欠臣已節次

派員會同地方官妥協辦理務令均沾寔惠現今

軍務告歲

臣

於八月十八日自固原起程周歷查

察次日至海城係鹽茶廳同知駐劄地方離西門

十五里即田五所住之小山該處逆惡二十餘家

勒洗淨盡現已並無一人土房數間窪洞十餘處

俱經鏟填平燬其田五祖父塚墓亦已剗挖起出

屍身剝骨揚灰至城內回民八十餘戶曾經幫同
守城出力者夾道跪迎情形甚屬感懼過海城四
十里即西安州該處本係土堡又類廢殘缺處甚
多而署都司王宏毅已先帶兵至鹽茶協同守城
是以賊至不能守禦即被攻破賊亦未及停留焚
掠止刦開軍器庫搶取旂幟刀矛數件而逸至經
過劉家井打喇赤狼山馮家園各地方俱係官兵
與賊打仗處所臣又從小道繞至馬營水官川馬

家堡一帶巡查該處兩旁皆係崇巒疊嶂中間一道山溝約長二百餘里總名官川此內各村庄回民雜居回人約有六百餘戶從賊者居其半俱經殲戮淨盡現存三百餘戶皆安靜畏法良回其首報引拏餘賊一百七十餘名有監生馬如仁及馬良才馬良能三人尤為出力臣將馬如仁賞給千總頂帶馬良才等優加賞賚以示鼓勵至馬家堡靠山居險路迥叢雜

聖明於數千里外早慮及賊匪翻山遁逃而剛塔帶兵
惟知在堡前攻勦並不嚴密圍堵誠難辭咎二十二
日至靖遠城內民居稠密市肆殷阜皆因地近黃
河土沃樹繁於甘省迤東各州縣中較為富庶是
以為賊所覬覦幸該處本有存城兵百餘名又遊
繫富成自省城帶兵六百名於四月二十日辰刻
至縣賊匪即於已刻攻城兵民協力守禦將賊擊
退而田五所勾結之內應逆回一百三十餘名又

俱先行拏獲正法賊始沮喪而遁

臣

傳集縋城殺

賊武生劉養鵬兵丁范大全面加獎慰即行拔

補外委其餘守城出力並拏獲內應之兵民夫役

及老教回民軍流遣犯俱經分別獎賞

臣

即由靖

遠渡河至田五糾約附逆之糜子灘查勘該處回

民百餘戶盡數從逆節經殲戮搜捕淨盡各犯家

屬久經跳河溺斃又賊過糜子灘時迫脅漢民展

廷隆不從將伊一家五人殺死經前督

臣

李侍堯

奏明奉

旨賞卹今查展廷隆尚有一子

臣

傳令進見慰撫優加

賞卹又經過萱帽塔蔡家河等處俱係萬山環繞

一徑盤紆所過山溝窪洞俱令隨帶弁兵逐細搜

查寔無竄匿餘匪

臣

於二十五日進蘭州省城闔

城士庶民回扶老攜幼至黃河西岸夾道迎迓其

歡欣愛戴俱出至誠所有經過各屬回民

臣

親加

曉諭以厯次欽奉

諭旨不肯波累株連逾格

恩施宜各安分守業至從前倡設新教各逆犯俱各身
膺寸磔妻子殲戮靡有孑遺此後惟當觸目警心
痛自改悔諄切開導該回民等均知感激愧畏其
被賊擾累各村庄俱已綏輯寧居廬舍被燬者亦
皆修葺葺葺蓋現在按戶撫卹散給口糧貧民無不
歡呼感戴其未經被賊各屬秋禾俱已收穫登場
在田油麥糜子雜糧亦各茂盛黃熟農民歡忭景

象恬熙再臣所過地方遼濶山嶺重叠大概荒蕪
處居多皆因地土磽确不能墾種是以人民稀少
墩戍亦屬寥寥前經

奏請添汛設兵仰蒙

俞允容候查明會同該提督等酌議妥辦

福康安又奏言臣行抵固原薩炳阿所領左哨兵
丁俱在本營既可就近傳詢而涼州守備福泰原
帶未經被傷弁兵亦已調取前來當即詳加訊問

嚴切跟究據涼州外委黃雲王永隆兵丁李印祥
徐奉得等同供我們跟隨松山營守備福泰於六
月初八日自中腦泉起程由荒草嶺黑石山張牙
水口一帶搜捕賊匪初九日未時至白楊嶺福守
備領衆兵尋取柴水造飯忽有賊匪八九十人從
南面山溝內突然衝出與官兵接仗官兵猝不及
防衝為兩處賊人分作三股一股堵截張牙水口
道路兩股又分左右接仗正在攪殺時有蘆塘營

遊擊蘭發甲帶兵到來將賊人用鎗擊退賊匪走
上山梁彼時天色已晚官兵隨佔據張牙水口石
嘴放鎗抵禦次日黎明有副將玉柱帶兵從南山
梁下來賊始竄逸查看陣亡官四員陣亡兵丁二
十九名當時寔無首先退潰之人況該處三面皆
係高山一面下臨黃河賊又接住路口無從退避
等語臣以該弁兵等所供未足憑信嚴加駁詰並
詢之遊擊蘭發甲等據稱該處地勢及遇賊情形

尚屬相符查福泰帶兵百餘即便尋柴造飯亦應預為防備何至猝遇賊匪八九十人衝出即失利損傷是始而輕敵大意既而怯懦無能綠營積習殊堪痛恨除陣亡守備福泰千總趙良樞夏治外委秦玉陣亡兵丁二十九名遵

旨毋庸議卹業於造冊時扣除外其現存弁兵內雖無首先退縮之人亦未便置之不議應將黃雲王永隆革去外委兵丁李印祥等交與涼州鎮總兵各

加重責示儆至遊擊薩炳阿所領左哨兵丁孰先
退走之處詢問該遊擊據稱當日遇賊打仗頭帶
石傷即覺昏沉寔不曾見兵丁內誰先退潰等語
隨提集弁兵切寔研究令將首先退潰之人據寔
舉出並諭以如隱飾不舉即將伊等全行治罪該
弁兵等始猶互相推諉嚴切究詰始據左營把總
白禮外委田生龍等供稱本年四月二十三日在
打喇赤遇賊打仗正在攪殺之際見本哨左營兵

丁王天良前營兵丁朱廷奎先行退走彼時有本
隊目兵楊和中周祿一同看見隨詢之楊和中周
祿所供與把總白禮等相符臣即提該兵詢問初

猶狡賴迨衆兵互相指証該二犯亦俯首無辭臣

查綠營官兵向來怯懦皆由不能明曉軍律所致
今左哨兵丁王天良朱廷奎既查明首先退潰理

應正法示衆隨傳集各營兵丁向其明白曉諭以
官兵征勦賊匪臨陣退縮兵不顧將按軍律必當

正法與其退縮而就戮不如爭先殺賊成功既可
以邀賞叙萬一死事子孫家屬亦可得優卹況未
必死於賊而退回者必死於法王天良朱廷奎即
係前鑒曉諭畢將該二犯正法訖俾各營兵丁咸
知儆惧臣又思兵丁臨陣畏縮皆因該管將弁平
日約束不嚴毫無訓練以致畏怯退潰亦應嚴加
懲創所有帶領左哨之把總白禮徐浚得穆緒才
外委田生龍王榮壽化天沛武滿魁七員均應革

職發往伊犁効力贖罪遊擊薩炳阿統率左哨所
帶石傷尚輕即不能管住衆兵任其退走亦難辭
咎相應請

旨一併革職均奏入

上諭該部知之

十三日乙丑

上命軍機大臣傳諭福康安曰從前賊回滋擾靜寧州
時驛路阻滯所有五岱等在伏羌縣拜發奏摺係涇

陽驛差人探路步行傳送當經傳諭福康安查明傳送之人優加獎賞現在尚未據覆奏逆回梗阻驛路該驛能差人步行傳送軍營緊急文報尚屬可嘉着福康安即查明當日傳送何人如係干把外委即應量予陞等或係兵丁亦應酌賞銀兩以示鼓勵

二十日壬申福康安奏言

臣

前於七月十三日接

據副將趙繼鼎稟稱初十日抵馬家河外委趙宗先帶兵四十四名於前一日駐守山梁賊匪已將

地保馬寅等三人殺死逼脅該處回民男婦大小一百餘人齊上空堡正在查問間逆匪俱從堡子內吶喊撲出約有五六十人當即帶兵進剿殺傷賊匪數名賊遁入堡內不出一面飛調安定守城官兵前往攻打十一日攻開賊堡賊匪乘間竄逸隨入堡內將男婦大小一百餘名悉行殲戮追至馬家寨殺死男婦七十餘名口及至高家灣地方又遇賊百餘人抵拒官兵傷斃外委趙宗先及兵

丁數名經官兵勦殺多人餘仍竄遁請飭發兵追
勦隨派侍衛額爾登保副將和倫帶兵七百餘名
馳往該處督同搜捕追至昌家岔青嵐山個家岔
劉家店一帶陸續殺傷數十名餘被各路官兵截
拏及縣役鄉保等擒獲三十餘名又追急自戕數
名此項賊匪方得殲除淨盡臣思馬家河回民既
經被賊逼脅上堡抵禦誠如

聖諭卽與從逆無異不得復稱爲良民但當趙繼鼎攻

開賊堡時賊匪業已乘間竄逸該副將即應督兵上緊追勦至堡內餘剩老弱婦女無難查辦乃該副將不以追賊為急帶兵入堡先行殲戮且該處回民既畏賊匪裹掠紛紛竄逸該副將帶兵順道搜捕凡遇被難奔逃藏匿回民並不訊取親供問明是賊與否即一併勦殺尤不免濫及無辜況追至高家灣尚有餘賊一百餘人與官兵接仗查馬家河逃回之賊僅止二十餘人則此百餘人即

係堡內逸出幫同拒捕者其該副將前此所戮非
盡係真賊可知實難辭辦理不善之咎惟念該副
將究屬無心誤殺是以

奏請革職發往伊犁効力贖罪奏入

上諭內閣曰前因閱刑部核覆阿桂福康安奏洮岷
協副將趙繼鼎治罪摺內有外委趙宗先前往馬家
河擊賊時賊匪聞信逼脅回民男婦大小一百餘人
齊上空堡抵禦等語是該處回衆業經聚衆抗拒不

得謂為戮及無辜當經降旨詢問福康安茲據覆奏
馬家河回民男婦一百餘人寔俱經被賊逼脅上堡
惟該副將順道搜捕時並不訊取親供一併勒殺難
辭辦理不善之咎等語回民既從賊上堡抵禦且外
委趙宗先等皆被傷害是其抗拒傷官已不得復稱
為良民趙繼鼎於前往搜捕時不待取供即加殲戮
固未免失之冒昧然綠營將弁往往遇賊怯懦今該
副將能奮勇殺賊其失尚屬可原趙繼鼎著加恩免

其治罪留於陝甘遇有遊擊缺出題補

同日福康安入奏言據安定通渭等縣解到從賊逆犯哈九等二十七名縱賊縣役張金玉福士二名又緣坐犯屬馬彥等二十二名

臣

逐一提集嚴

訊此內哈九黃明撒中才係糜子灘從逆回匪隨同田五攻撲靖遠城又在白楊嶺傷害官兵情罪重大張金身充縣役奉差往喚張文慶乃以田五造反牽連之語私相告知該犯本係回人又與張

文慶同族認識故為透露消息顯屬知情縱逆王
福士係通渭縣頭役奉差查拏要犯並不親至該
庄輒令張文慶族人張金前往以致洩漏風聲張
文慶得以糾衆滋事及賊至城下不知隨同該縣
固守城池反聽賊人指使將監中回犯全行放出
實屬藐法縱賊楊世祿等二十一名均各供認被
賊逼脅或隨同抗拒官兵或為賊跟役屬實白鳳
白文亦於賊匪藏避該庄隱匿不首馬自成係小

山逆回田養順姻親因接取伊妹透露消息均屬
有心黨惡以上逆犯哈九等二十九名又緣坐回
犯馬彥等二十二名俱應概予駢誅臣於審明後
即派委陞任按察使陳步瀛臣標中軍副將王暈
監視行刑按名正法以淨根株而示懲創現又據
安定縣知縣陳善儀稟報選派幹役於各處深山
僻洞內搜獲糜子灘餘匪劉天全毛大毛六娃子
三名又伏羌縣知縣楊芳燦稟報拏獲從逆之犯

馬萬蒼一名已飭迅速妥解俟解到後即上緊審

辦

福康安又奏言

臣

於二十五日至蘭州省城據靜

寧州解到暫留候質之田守載等十五犯

臣

覆加

鞫訊此內田守載係首逆田五胞姪田重交係李

自黨繼妻隨嫁之子張泰係張文慶之子馬三十

七係張文慶之壻俱首先隨同造反馬見幾之弟

馬建業及馬訓馬伏德馬保馬廷芳楊存義馬友

馬金玉之弟馬明玉黃明等或隨賊撲攻城池或沿途搶掠村庄情罪重大馬如虎為馬文燾登記入夥姓名馬德預聞張文慶逆謀均屬法無可貸前因解送熱河各要犯或有供出別項情節應須訊問之處是以將田守載等暫留候質今已無可質訊未便久稽顯戮又安定縣解到六十九等十八犯隆德縣解到任秀等四犯通渭縣解到王忠元等四犯伏羌縣金縣解到丁再學馬海達等二

犯

臣

逐一提集研鞫俱各供認被賊逼脅或隨同

拒敵官兵或為賊服役屬實又靜寧州解到底店
掌教馬伯倫鄉約馬相寅二犯雖於底店回匪未
經起事之先即被該署州涂躍龍傳至州城差人
看守未及從逆似有一線可原但臣細核情節該
二犯身充掌教鄉約底店及附近村庄九百餘戶
盡數從逆皆由該二犯平日毫無管教的束豈能
置身事外況首惡馬文燾置造軍器糾集黨羽該

二犯既係掌教鄉約安得諉為不知何以不先行
出首是該二犯仍應照隱藏謀反大逆律正法又
鹽茶廳解到回匪趙得隆于首逆李自黨藏避該
庄隱匿不首實屬有心黨惡以上逆犯田守載等
四十六名又緣坐回犯沙倉等五名均當概予駢
誅_臣於審明後即按名正法以彰

國憲

福康安又奏言_臣遵

旨即傳守備池清向其嚴切究詰據供當日在馮家園
遇賊接仗時我見官兵失利損傷心中着急即帶
領兵丁數十名先上山梁佔據其餘各兵始陸續
上山站住擲石放鎗將賊擊退我就帶領餘剩官
兵赴劉家井大營若衆兵上山我在山下一人一
騎安能抵禦衆賊如使我預先退避又何能復帶
領餘兵前赴大營等語臣又傳集原領兵之把總
外委以及旗隊目兵隔別訊問所供亦屬相符是

該守備實係帶兵上山尚無退走情事但賊匪不過烏合之衆池清帶兵二百名雖遇賊五百餘人亦何至不能抵禦誠如

聖諭即使查無退走情事亦止當免其一死豈可復令

忝列戎行

臣

前摺未將該守備聲請革職實屬踈

漏應請

旨將守備池清革職並發往伊犁効力贖罪以示懲儆
均奏入

上諭該部知之

福康安又奏言查馬明心倡立新教常往來河州之洪濟橋唐家川及伏羌等處傳習煽惑是以該數處黨羽較多其河州所有徒弟馬得明等于蘇四十三肆逆攻破河州及由洪濟橋唐家川往攻蘭州時俱經糾合從逆有臨陣被官兵殲戮者有掣至蘭州省城正法者親屬緣坐婦女幼孩俱已發遣_臣留心細訪現在實無餘孽存留至伏羌縣

拜從馬明心為師之馬得建等十六名於四十六
年勦滅賊匪後經大學士公阿桂等派按察使福
寧前往按名拏獲解至省城審明各該犯等與撒
拉爾逆回住居遙遠向不認識蘇四十三實無從
逆情事但既拜從馬明心為師甘心崇奉即與逆
黨無異業將馬得建等於省城正法因各該犯附
從馬明心在蘇四十三未起事之前尚無通賊實
跡是以免其緣坐此次賊匪起事攻擾伏羌臣恐

各該犯子嗣內有乘機勾合以圖報復者曾飭該縣密加訪察嗣據稟稱各該犯家屬尚知儆懼畏法並無從賊之人而馬得建之子馬映龍於賊匪未攻城之先出首城中內應馬中驥蘇玉奇等十四名幫同該縣楊芳燦竭力擒拏正法追賊匪攻城同回民鄉約白中偉分駐守禦最為出力經前

督_臣李侍堯

奏明賞給千總職銜以示鼓勵_臣查河州伏羌二處

馬明心徒弟俱被官兵殲斃並拏獲正法屬實但
當日亦止據顯有形跡者查拏辦理而自馬明心
正法之後各屬回民學習新教者仍有一半總由
馬明心首先倡立輾轉流傳若言各屬必無馬明
心徒弟臣亦難以盡信現在通省回民感激畏懼
安靜守法自不便復事搜求致滋紛擾臣惟有時
刻留心密飭各屬稽查防範遇有傳經惑衆煽誘
滋事之人即密速查拏從嚴究辦以期防微杜漸

永底牧寧其馬泉灣之馬三阿渾馬如龍二犯馬
如龍業據安定縣拏獲甯明正法馬三阿渾據獲
犯張泰等供稱在石峯堡賊營已為官兵殲戮又
官兵在雲霧山打仗時擒獲賊目馬玉華一犯當
時於訊取供詞具奏後即經正法奏入報

聞

欽定石峯堡紀畧卷十八

欽定四庫全書

欽定_{史部}石峯堡紀畧卷十九
二十九

中書_臣張經田覆勘

總校官檢討_臣何思鈞

欽定四庫全書

欽定石峯堡紀畧卷十九

十月初三日乙酉

上命軍機大臣傳諭福康安曰昨召見提督俞金鰲據奏稱逆回經過地方所有廟宇俱被焚燒神像亦多殘毀此皆逆回惡貫滿盈以致獲罪神明自取殲滅其有廟宇未經焚燒而神像殘燬者自當量為修葺裝塑整肅岩所燒各廟宇扯全無者即不必另行建

蓋著傳諭福康安查明辦理又據奏稱聞得從前陝甘兵丁平日皆預備乾糧一遇徵調即可剋期起身自平定準噶爾回部之後遂因循不復儲備等語兵丁乾糧自當平時籌辦以備緩急之需如恐有霉朽原不妨出陳易新抵放兵餉並著留心妥辦以復從前舊制

同日

上諭內閣曰川省屯練降番兵丁因從前甘省蘇四十

三滋事及本年勦滅石峯堡逆回兩次俱經徵調會勦該兵丁等由松潘一帶遠赴軍營俱能踴躍抒誠急公趨事但因向來徵調係在口外地方程站不遠一切背負騎馱自行備辦未經議給夫馬今既由鄰省檄調該兵丁等跋涉維難自應照綠營兵丁之例一體給與夫馬以昭體恤現在軍務告蒞該兵丁等整旅回川嗣後每遇鄰省有調派之事著給與夫馬俾利遄行以示優恤屯番之至意

初九日辛卯福康安奏言臣查甘省原額設兵五萬六

千六百餘名陝西省原額設兵三萬四千五百九十餘名
除節次裁撥移駐新疆屯防眷兵及扣留公糧公費養
廉不補外通計陝甘二省止存兵五萬五千九百餘名
較原額少兵三萬五千二百餘名乾隆四十六年欽奉
諭旨以邊陲重地捍衛宜嚴特令酌籌添補共添實兵
一萬二千七百餘名合之舊存兵額約有七萬列
鎮分營兵力不為不厚惟是前此酌添兵數其重
在於督撫提鎮各標令各添兵數千以資鎮守而

供調遣次則緊要營堡添兵數百名至數十名不
等以扼要隘而重稽查至州縣之防禦墩戍之稀
疎本未議及臣到省後詳加體訪甘省河西各屬
原設營堡墩汛尚為嚴密惟自蘭州迤東至涇州
一千餘里道路綿長北控邊城南通隴蜀兼以崇
山峻嶺重複盟迴外則番族環居內則民回錯處
大路各府州縣原設防兵無幾墩戍寥寡不足以
資防禦今擬於平涼府等處添兵自一百數十名

至數十名不等則平時既可備差操有事亦足供
守禦又於地方空濶處酌添墩堡數十座撥兵分
駐俾聲息相通並常令其會哨周巡則奸宄不至
於潛藏而匪徒亦易於緝獲查平涼府原設兵五
百名除分防外存城兵止三百六十三名該處城
池較大為甘省門戶今擬添兵一百五十名以足
六百五十名經制外委一名額外外委三名六盟
山等處要隘添一營汛設千總一員經制外委一

名額外外委一名兵一百名以資防範而附近底
店潘隴山等處均可稽查彈壓靜寧州原設兵三
十五名今擬添兵一百十五名以足一百五十名
經制外委一名額外外委一名隆德縣原設兵四
十名除分防外存城僅十六名今擬添兵二十四
名額外外委一名並於通衢大路舊有汛戍空濶
處添安墩堡三十九座務俾聲勢聯絡又通渭所
屬之馬營監為舊時縣城民居稠密南達通渭伏

羌壯連會寧安定乃適中之地擬於該處酌添一營設遊擊一員把總二員經制外委三名額外外委四名兵五百名酌定存營兵三百名以資控制彈壓其餘二百名在於四處扼要之所安墩堡四十座而附近之石峯堡馬家堡官川等處均可巡查稽察庶奸宄不至於潛藏又通渭等縣原設額兵太少不但有事不足以資守禦即平時亦實不敷差遣今擬於原設額兵之外清水縣添兵十名

通渭寧遠伏羌漳縣各添兵十五名禮縣西和秦安兩當各
添兵二十名均足三十名之數莊浪地方係縣丞分駐添
兵三十名三角城等處添兵四十名又自固原至靖遠四
百餘里地方遼濶回民雜處靖遠至省三百餘里萬山
環繞逕路縈紆舊有墩戍甚屬寥寥聲勢不能聯絡
今擬添兵二百二十名分安墩堡四十四處星羅棋
布庶可以壯聲勢而重巡防臣通盤籌畫此次添
設營汛共需官弁二十三員內遊擊一員守備一

員千總一員把總三員經制外委六名額外外委十一名兵丁一千三百四十名額外外委即在各兵數內核計每年共應需額餉三萬四千餘兩

國家經費有常不可不通盤籌酌查陝省下馬關一營止設兵二百二十餘名即有遊擊一員於營制未協該營有守備一員足資統轄應將遊擊裁移馬營監分防管領此外于西安軍標撥守備一員千總一員把總二員經制外委三名固原提標撥

出把總一員經制外委二名寧夏鎮標撥出經制
外委一名足數分駐所需兵丁一千三百四十名
於督撫提鎮各標及各協營內擇其不近邊關又
非大路並無番回錯處無甚緊要兵額較多之處
將零星尾數裁移抽撥已數應用如此通融辦理
則應設營汛墩堡地方可以照數增添防守既並
森嚴聲勢更加聯絡而各營抽掣兵丁無幾亦不
至兵力單弱庶

帑不虛糜兵歸實用至官兵應需衙署房間及新添
各處墩堡詳加計算應需工料銀二萬四千餘兩
臣酌量於新兵緩立馬匹節省草乾料豆銀兩內
動用蓋建以備官兵棲止毋庸支銷正項錢糧其
應抽撥兵丁各營分先期令各該將備切實攷驗
核其年力衰庸弓馬平常及新補各兵內年輕技
藝生疎者按照定數目預行裁退以便新定地方
就近募補分駐於地方有裨謹繪圖貼說恭呈

御覽奏入

上命軍機大臣傳諭福康安曰據福康安奏酌派營汛
分駐官弁兵丁於陝甘兩省各標管裁移抽撥一摺
已交軍機大臣會同該部議奏矣但閱奏到圖內如
隆德縣現添兵二十四名除分防外存城兵止有四
十名通渭縣添兵十五名存城兵亦止有三十名該
處地方遼濶究未足以資巡防而壯聲勢今于該省
裁移抽撥之外再准其添設額兵三千名著傳諭福

康安即通盟籌畫如隆德通渭等處係縣城而兵力尚單者即酌量增添每處約須有兵百名其餘各要隘處所亦一體均勻添派務俾兵勢聯絡足資防衛稽查方為詳妥此摺暫行存記俟酌議添兵奏覆到日一併議奏再降諭旨

福康安又奏言前奉

諭旨各處村庄被賊搶掠受害百姓究有若干官兵節次打仗陣亡者究有若干並著查明據實覆奏欽此

查此次逆回田五自鹽茶廳所屬之小山起事即
攻破西安州土堡由裴家堡松柏子崖永安堡板
窰溝柴新梁新塞溝小紅溝一帶搶掠村店撲攻
靖遠縣城被官兵擊退遁回馮家園打喇赤狼山
與官兵相遇打仗田五中鎗自戕餘黨自馬營山
竄至官川勾結從逆回匪復行蔓延又在馬家堡
設計乘間翻山遁逃竄聚石峯堡肆出滋擾攻破
通渭圍攻伏羌直至華亭清水秦安又勾引底店

賊匪馬文燾攻擾靜寧搶掠化平三合通邊各村
庄計賊踪所過千有餘里而其往來搶劫村庄被
其荼毒者甚多茲據各州縣查明稟報被賊搶掠
大小村庄一千二百餘處傷斃大口一千六百九
十六名小口三百三十三名現已給予撫卹銀兩
至官兵節次與賊打仗陣亡者自六月十一日起
至七月初五日止陣傷官兵六十四名其從前跟
隨剛塔明善等節次與賊打仗陣亡官兵六百八

十五名共七百四十九名奏入

上諭內閣曰據福康安奏查明逆回自小山起事勾結蔓延賊踪所過千有餘里搶掠村庄傷斃人口各數回民等久列編氓即與齊民無異況甘肅地方薄瘠時有災歉國家惠愛邊氓蠲賑之事幾于無歲不有其沾被恩澤獨較他省為優回民等同隸版章百十餘年受恩最重乃于光天化日之下竟敢創興新教惑衆肆厥鴟張攻城掠堡擾害良民蹂躪村庄傷斃

人口如許之多罪惡貫盈神人共憤究其起事之
由係田五等久蓄逆謀各處新教回民暗相煽惑肆
行不法並非因地方災歉不加賑恤與夫縱容貪官
污吏擾累百姓激變生事可見逆回等狡獪性成膽
敢殺害良民梗悖王化前將生擒首逆張文慶等解
赴行在親加廷訊刑夾盡法處治按律寸磔其名下
家屬亦已誅無孑遺尚不足以洩忿恨而快人心其
從逆各犯名下分賞為奴幼孩一經逃逸拿獲後即

立時正法以懲兇孽此皆逆回等自取罪戾所致嗣後各省回衆務宜各知警惕安靜守法勉為良民以田五張文慶等為戒將此通諭中外知之

福康安又奏言據安定通渭伏羌等縣解到從賊逆犯劉天全等四名又緣坐犯屬馬福海等三十三名臣逐一提犯嚴切鞫訊劉天全毛大毛六娃子係康子灘從逆回匪隨同田五撲攻靖遠城又在白楊嶺抗拒官兵罪大惡極未便稽誅毛六娃

子雖年甫十四但從賊日久亦難輕縱蔡三十六
從賊服役法無可貸又緣坐回犯馬福海等三十
三名或父兄從逆或子弟附賊均應概予駢誅臣
於審明後即派委按察使汪新臣標中軍副將王
纛監視行刑按名正法以彰

國憲嗣又據署靖遠縣知縣通判吳廷芳選派幹役
於邊沙溝地方拏獲糜子灘餘匪馬二娃子一名
已飭迅速起解俟解到即上緊審辦臣仍嚴飭各

屬實力搜拏如有潛逸匪犯務期盡數擒獲毋使
一名漏網再臣前奉

諭旨田五李鬍子及張文慶大通阿渾等祖父墳墓亦
應刨挖起出屍身一併揚灰以為叛逆者戒欽此除
田五祖父胞兄墳墓在小山地方已經刨挖揚灰
此外各逆犯祖父墳墓當即分派各該府前往查
辦並令刨挖時傳集回衆明切曉諭以為叛逆者
戒茲據各該府稟稱李鬍子即李可魁其父李自

党業經解送熱河凌遲處死家屬婦女盡行正法
李自党之祖李朝佐父李仲墳墓在相離老鴉溝
三十里之界牌店張文慶之祖張其金父張成墳
墓即在草芽溝地方馬四娃之本生祖蘇友順因
運送軍糧在口外病故骨殖並未回鄉其祖母李
氏當即再醮不知下落馬四娃之親父蘇大鵬母
馬氏在于大通縣南門外埋塋該府等親赴各該
處齊集回衆刨挖墳墓起出各屍剝骨揚灰回民

觀者咸稱各兇犯孽由自作天網難逃情形甚知
儆畏等語並飭于各該州縣城市村鎮凡有回民
之區遍行出示曉諭以示鑒戒奏入

上諭該部知之

福康安又奏言查馬見幾一犯于官兵抵石峯堡
時首先投出欲將首逆等擒獻及賊人商謀逃竄
復遣家屬到營密稟官兵得先為預備因有一綫
可原奉

旨從寬免其一死永遠監禁仰見

皇上法外之仁至馬見幾之妻馬馬氏子馬四娃子年
十三歲俱在靜寧州監禁該犯馬見幾究曾從逆
眷口亦難聽其自便應仍交該地方官嚴加管束隨
時稽查至馬見業一犯久經從賊自未便因其兄
業經免死概從寬宥前已審明同田守載等一併
正法所有馬見業之妻馬張氏併年未及歲子女
三名現在併案發遣奏入

上諭曰馬見幾之妻子亦當發伊犁給兵丁為奴

福康安又奏言查明善所帶退回之各將弁兵丁雖續經派入將軍提鎮帶領亦有打仗出力者其功僅足以抵罪誠如

聖諭豈可濫邀賞敘現已查明概行扣除所有抵店石峯堡兩次在事出力之大小員弁侍衛章京滿漢屯土各營官兵臣前經會同大學士公阿桂秉公查核分別等地現已將各冊送部遵

旨議敘其有出衆超等奮勇當經指名保奏蒙
恩陞用至節次打仗陣亡受傷官兵前經屢奉

諭旨查明照例一體卹賞內除白楊嶺遇賊打仗始而
輕敵大意繼又怯懦無能所有陣亡守備福泰千
總趙良樞夏治外委秦玉陣亡兵丁二十九名遵
旨毋庸議卹又搜捕馬家河餘匪之外委趙宗先聲稱
一併勦洗以致賊匪逼脇回民入堡抗拒該外委
不能抵禦被賊殺死咎由自取業經

奏明毋庸議卹應一併扣除查此次勦滅賊匪自
六月十一日起至七月初五日止底店石峯堡打
仗並各處搜山遇賊打仗共陣亡官弁四員兵四
十一名傷亡官一員兵十八名其四五六三月跟
隨剛塔明善等在打喇赤馮家園狼山馬營監伏
羌雲霧山石峯堡鄒家河等處打仗陣亡官十八
員兵六百四十四名傷亡兵二十三名並受傷各
營官弁兵丁臣逐一詳悉查明數目分別受傷實

在等第造具清冊咨送兵部查議辦理至此甘省各驛馳遞文報之弁兵人等俱已酌予賞賚其承辦驛站護送兵差之各員臣亦已遵

旨查明分別等第咨部議敘奏入

上諭該部知之

十七日己亥軍機大臣會同刑部奏言竊照甘省失察逆回修堡打造器械各員前經奉

旨交臣等嚴審定擬具奏嗣據該旗將已革道員文德

先行解部並於九月十五等日據陝甘總督福康
安委員將張廷桂張燮永盛沈鳴皋王立柱敦桂
及應訊之民人董有已革隆德縣知縣鍾潤先後
解到臣等會同逐案研訊查回民馬正芳修理石
峯堡一案革職鞫秦階道張廷桂於董有控告修堡
之時既已失察于前及至本年四月田五起事謀
逆該員雖已告病但當地方多事之際並不力疾
馳赴該處督同防禦竟爾置身事外其罪實無可

逄己革蘭州府知府張燮前在鞏昌府任內于四十七年八月董有復行控告修堡之案未能立即查辦前任鞏秦階道文德係四十六年九月卸事但馬正芳等于三月內修堡其時該員不能先事覺察均屬罪有難辭至失察打造器械各員革職鞏昌府知府永盛于護理平慶道時因奉委查審案件未能將逆匪等私造器械等情查明辦理即有應得之罪革職平慶道沈鳴舉係閏三月到任

四月內聞田五謀逆即親赴各處拿獲逆犯馬海龍等數十名雖逆犯于正二月打造器械在該員到任之前但到任後未能查明究辦亦屬咎無可諉革職平涼府知府王立柱委署鹽茶同知敦柱均係二三月內甫經到任四月間田五起事之後雖該二員督兵雇夫竭力守城並親赴各處拿獲賊犯及賊眷屬多人甚為出力但逆犯等于正二月內已有打造器械之事到任後未能即行查出

均難辭咎除王立柱敦柱續經陝督福康安奏明
該二員于此案守城拿賊尚屬出力臣等核其功
罪業經革職應毋庸議外張廷桂文德張燮永盛
沈鳴皋五名應請從重發往軍臺効力以示懲儆
其解京質訊之民人董有及書役楊世芳等已將
兩次控告及該縣審斷各情逐一訊明屬實應俱
行省釋至己革隆德縣知縣鍾潤於五月十八日
接收底店武舉馬文燾被逼從逆之字因本日即

據村民具報回衆業已至村搶掠當將搶掠情形
飛行通報其馬文燾來字未經轉報即屬不曾受
理雖據供竭力防守拿獲逆黨縣城尚未失事亦
未便輕縱應將該縣鍾潤卽照告叛逆不受理滿
徒例從重發往軍臺効力

同日軍機大臣奏言遵

旨將逆回滋擾時王立柱等如何防護城池及拿獲賊
匪若干人之處詢問王立柱數柱據王立柱稱本

年三月內到平涼府知府任四月內田五起事官
兵進勦立柱奉委在靜寧州一帶往來督催糧運
五月二十日聞賊回糾合底店回人劫掠村庄因
即在靜寧州城內會同該州涂躍龍等預為防守
二十五日馬文燾率賊二千人在城外上山剗營
焚燒關廟圍逼州城復同涂躍龍等督率兵役民
夫竭力守禦施放鎗砲打死賊人二百餘名賊匪
攻擾三晝夜至二十七日始行竄去但于到任後

田五打造器械未能查出實屬糊塗負職等語又據敦柱稱本年三月內署理鹽茶廳同知因盟查鄉倉未能在城四月十四日一聞田五謀逆之信即捐貲將該處土堡上緊修整並選募民夫上城防守田五見鹽茶廳有備不敢攻擾逕撲西安州堡當即帶領兵役親赴小山將田五之兄田友及犯屬六十餘名口悉數擒拿又陸續拿獲逆犯李可喜等六十三名俱經正法但于田五私造軍器

一事未能查出先事查拏就是應得之罪等語所
有遵

旨詢問該二員守城拏賊出力之處理合奏

聞均奏入

上諭曰王立柱數柱俱著加恩交部帶領引見沈鳴皋
永盛亦著加恩准其贖罪俟贖罪後仍發往甘肅以
知府補用餘依議

二十六日戊申福康安奏言竊臣前在軍營檢閱

案卷有秦州詳報回民密尚德等潛謀從逆私製
刀矛運往伏羌一案臣細核此案情節頗多疑竇
即提犯至省徹底跟究嗣據該州知州將案內犯
証陸續解到臣率同陞任按察使陳步瀛按察使
汪新提犯逐一研訊緣密尚德係秦州回民伊父
密自貴早故伊母納氏改嫁伏羌馬姓生子馬騰
鸞與密尚德時相往來本年閏三月內馬騰鸞與
伏羌回民馬中驥馬稱驥馬元驥等潛謀構逆馬

騰鸞糾約密尚德入夥密尚德允從馬騰鸞囑令
打造軍器密尚德轉向伊戚回民馬世超商議馬
世超以打造軍器恐人識破遂哄誘與密尚德同
姓不宗之回民密世忠以鐵器出口販賣儘有利
息誘令出本製辦刮刀鏟刀裁刀等物其刮刀一
項馬世超言欲長二尺寬寸餘比尋常刮刀較長
聲稱口外刮香牛皮所用遂與密世忠雇覓鐵匠
牛花李迎章李開業打造刮刀一百二十把鏟刀

二十一把王喜打造裁刀四十三把馬世超又私
出重價令王喜打造矛子四十一把嗣因密世忠
之父聞知不令其子出口密世忠抱怨馬世超所
製鐵器無處銷售馬世超聲言運往伏羌可以賺
錢因密世忠必須現錢馬世超隨給錢四千文取
去刮刀五十九把同密世忠送至密尚德家密世
忠見密尚德家有羊皮包裹矛頭私向馬世超查
問馬世超始將與密尚德潛謀從逆緣由告知密

世忠懼怕即欲首告又恐打成刮刀等物入官顧惜資本隱忍不言經鐵匠王喜之叔王增良查知于四月初六日赴州首告前任知州王彞憲拘集人証審訊鐵匠牛花李開業李迎章供認打造刮刀鏟刀王喜供認打造裁刀矛子並于密世忠家起獲刮刀六十一把鏟刀二十一把裁刀四十三把維時密尚德聞王增良首告之信先遣伊子密賴尺嗎將所藏刀矛運往伏羌馬騰鸞家藏匿馬

世超知茅子業已運開堅不承認密世忠亦不將
知有茅子實情供出該州刑訊二日未得確供令
衙役毛世德馬永泰將馬世超管押詎馬世超畏
罪于初八日乘間自縊身死該州驗明即于四月
初九日具文通報十六日文投省署其時田五業
經糾衆起事前督臣李侍堯已往鹽茶一帶查拿
係原任布政使馮光熊代拆代行隨即批令嚴切
究訊茅子下落該州王彝憲旋于二十六日卸事

並調往軍營辦理糧運至五月十一日鄉約吳耀
先據回民馬漢珍馬世榮告知以密尚德勾通馬
騰鷺糾約伊等從賊之言赴州首告接任知州于
鎰將密尚德拿獲到案隨接按察使陳步瀛札諭
並慶陽府知府王彝憲關移軍營拏獲賊目馬玉
華究出賊營有密姓回民年約二十餘歲隨賊打
仗其父密阿渾現在秦州令密速查拏其時該州
已將密尚德拏獲監禁關移伏羌查拏馬騰鷺詎

馬騰鸞已于五月十八日因勾通內應案內經伏
羌縣知縣楊芳燦率衆擒拿同馬稱驥等十餘名
稟明前督臣李侍堯批飭正法該州知州于鏗審
訊密尚德等錄供詳報臣又節次委員會訊總未
究出矛子實在下落茲臣嚴切根究並將起獲刮
刀等物逐一查驗惟鏟刀裁刀實係皮匠所用刮
刀與皮匠現用刮刀較長即與兵器無異嚴切鞫
問始據密尚德供認聽從馬騰鸞之言與馬世超

商謀打造軍器遣伊子運往伏羌並糾約馬漢珍
馬世榮從賊屬實密世忠亦將與密尚德家見有
矛頭等情供認不諱臣思密尚德遣伊子密賴尺
嗎將刀矛運往伏羌係如何運往密賴尺嗎既在
馬騰鸞家藏匿則伏羌拿獲馬騰鸞時何以無密
賴尺嗎踪跡及矛子下落而伏羌軍營等獲賊犯
馬玉華供稱賊營內有密姓回民約二十餘歲其
父密阿渾現在秦州等因是密賴尺嗎已將矛子

運往賊營從賊打仗伊父密尚德斷無不知其與
張文慶田五李可魁等必有預先往來勾結之事
至密世忠先與馬世超夥同打造刮刀等物後見
密尚德家藏有矛頭詢知謀逆緣由並不首告到
官又不將知有矛子實情供明始終狡飾顯係通
同謀逆其所供被馬世超哄騙欲打造刮刀等物
出口販賣並未知謀逆情節殊難憑信層層究詰
據密尚德供刀矛運往伏羌係自己買驢馱載暗

令兒子密賴尺嗎運往馬騰鷺家藏匿至拿獲馬騰鷺之時何以無兒子踪跡或是馬騰鷺遣往別處約人或係兒子潛赴賊營均未可定我已

被馬漢珍等告發收禁實不知我兒子在何處從賊打仗至從前糾約我的原是馬騰鷺他說是馬中驥馬元驥馬稱驥轉今糾約其馬中驥等如何與張文慶李可魁等勾通我的住處離鹽茶通渭遙遠又未親至伏羌並不知道他們原謀詳悉

亦無預先往來勾結情事。如果我與張文慶等認識，則賊近秦州，自應潛赴約會。何肯坐在家中靜候查拏？等因。又據密世忠供：我從前打造刮刀等物，實被馬世超哄騙。後來看見矛子詢知謀逆情由，彼時即欲自首。因打造刮刀等物費去大錢十六千文，俱是四處借來的一經自首，就要入官，沒有本錢還人。所以隱忍不言。若與密尚德、馬世超通同謀逆，則一聞告發，自必心虛，應將刮刀等物

隱藏別處何以一經查拏即時起獲這就是我並未通同謀逆真情至到官不肯供明原知道知情不首要問重罪但馬世超既不承認落得推托不知後來拏獲密尚德已經追出矛子下落知道不能掩飾纔據實供認等語臣復思密尚德等打造軍器潛謀從逆秦州必另有羽黨鐵匠王喜牛花李迎章李開業既各打造刀矛亦必有商同謀逆情事再三駁詰據密尚德供打造刀矛實係聽從

伏羌馬騰鸞糾約後聞賊人漸至秦州地方纔向
馬漢珍馬世榮言及即被旨告實無另有黨羽據
鐵匠牛花李迎章李開業同供實因馬世超所打
鏟刀裁刀均係皮匠所用刮刀雖與本地所用尋
常刮刀較長但信為口外刮皮所用寔不知即係兵
器等語臣即弔取蘭州城內皮匠舖中所用刮刀比驗
僅短數寸式樣尚屬相仿王喜供稱原知茅子犯
禁貪圖多得工價即為打造該犯等均係漢民並

無同謀從逆情事加以刑鞫矢口不移似無遁飾
臣又思打造矛子必非一人所能必另有夥黨嚴
訊王喜堅供實係一人打造並令當面試驗該犯
以一手扯拽風箱一手鉗鐵入火俟燒紅即停煽
用錘打造頃刻打成矛頭一把甚屬便捷其為該
犯一人打造似無疑義查密尚德聽馬騰鸞之言
商同馬世超私製軍器又糾約馬漢珍馬世榮隨
賊罪大惡極鐵匠王喜明知矛子係犯禁之物貪

圖工價膽敢為逆賊打造即係逆黨密世忠打造
刮刀雖被馬世超哄騙但明知密尚德家藏有矛
頭隱忍不首即係知情故縱應將密尚德王喜密
世忠三犯即行正法馬世超之子馬朋雖不知謀
逆情事律應緣坐應一併正法馬世超雖經自縊
仍飭戮屍牛花李迎章李開業打造刮刀雖非軍
刃可比但不查明來歷輒為回民混行打造亦屬
可惡應將牛花李迎章李開業發往伊犁給種地

兵丁為奴衙役毛世德馬永泰看守馬世超雖訊
無凌逼致死情事但不嚴行看守致令自盡應照
失于檢點致囚自盡律杖六十枷號一個月革役
折責發落王喜之父王增福兩目失明不知其子
打造矛子應免置議王增良查知伊胞姪王喜打
造矛子並不徇隱即行到官呈首尚屬可嘉臣已
酌量獎賞回民馬漢珍馬世榮一聞密尚德糾約
之言即告知鄉約出首尚屬畏法應即省釋並量

加獎賞起獲刮刀鏟刀裁刀應行銷燬牙子已經
運往伏羌賊營無從查起密尚德之子密賴尺嗎
於賊供內審出隨賊打仗是否被官兵殲戮尚無
確實證據臣已飭各屬實力嚴緝獲日另結仍飭
該州查明密尚德馬世超應行緣坐家屬照例辦
理至前任秦州知州現任慶陽府知府王彝憲于
王增良首告回民打造矛刀重案雖經審訊詳報
並于軍營訊出賊供後即飛移查拏要犯密尚德

尚非意存諱匿但于此等重案不即將要犯馬世超收禁致令乘間自縊又不能審出實情實屬昏庸疎玩僅予革職不足蔽辜相應請

旨將王曩憲革職發往新疆効力贖罪以為玩視重案者戒奏入

諭該部知之

上又命軍機大臣傳諭福康安曰據福康安奏秦州回民密尚德等潛謀從逆私製矛刀運往伏羌一案有

刮刀與本地尋常刮刀較長信為口外刮刀所用等語口外蒙古番衆原賴牲畜度日在在皆以熟皮售販從未聞有向內地專買刮刀之事而甘省向來因循不加稽查以致民間藉口混行製造逆賊遂從此影射私製軍器不可不嚴行防範着傳諭福康安飭屬嚴行查禁如有先經打造者不准出口仍嚴飭地方官出示曉諭舖戶亦不得私行賣給蒙古番回人等如敢違例打造售賣即照私行打造軍器按律辦

理

同日福康安又奏言竊臣前奉

諭旨田五私造器械起事及賊人等修堡挖窰係何人
任內之事即將貽悞之專管地方文武各官叅奏拏
交刑部治罪欽此前經臣會同大學士公臣阿桂查
明道府同知等官叅奏革職拿問交刑部治罪並
聲明所有專管兼轄武職員弁俟查明另摺叅奏
茲據固原提督哈當哈咨稱查得逆回于乾隆四

十六年三月及四十七年八月兩次修堡失察之
專汎官係鞏昌管把總葉虎兼轄官前次係署遊
擊秦州營都司魁元業經病故後俱係現任鞏昌
遊擊汪啟至失察田五起事之小山海城地方專
汎官係西安州營千總薩繼勲兼轄官係署西安
州營都司固原城守營守備王宏毅等因前來相
應叅奏請

旨將汪啟王宏毅薩繼勲葉虎革職拿問解交刑部治

罪再查遊擊汪啟前曾出兵金川蒙

恩賞戴花翎四十二年勦捕撒拉爾逆回節次打仗受傷調補鞏昌營遊擊此次在軍營帶兵打仗甚屬奮勇出力並經受傷前于保奏軍營出衆奮勇案內奉

旨遇缺陞用其功過兩不相掩謹據實奏明恭候
欽定奏入

上諭曰革職遊擊汪啟侯到京時交兵部帶領引見該

部知道

福康安又奏言據靖遠伏羌等縣解到從賊逆犯馬二娃子等六名又緣坐犯屬馬其奉等三十八名臣逐一提犯嚴加鞫訊馬二娃子係縻子灘回人本年四月賊匪滋擾裴家堡該犯手執鎗矛為賊巡更迨經捕勦隨赴鷹窩石藏匿後至白楊嶺隨同抗拒官兵潛藏被獲馬保寅被賊裹去隨從搶掠馬萬倉于攻擾伏羌時為賊看守帳房閭釐

于馬營為賊巡營被獲到案又復捏詞狡供俱屬
罪大惡極未便稽誅又同實係靜寧州衙役馬天
長係靜寧州馬夫五月間該州差令持告示諭帖
前往底店曉示回民該犯等被賊逼脅或為喂馬
或為看守帳房迨賊匪被官兵勦殺後始行逃回
該犯等係在官人役被逼從逆亦難輕縱又緣坐
回犯馬其奉等三十八名或父兄從逆或子弟附
賊法無可貸均應概予駢誅臣于審明後即派委

按察使汪新臣標中軍副將王彙監示行刑按名
正法以彰

國憲又現據伏羌縣知縣楊芳燦稟稱有賢家溝回
民馬希成馬重成綁縛從賊逃回之馬希中到縣
訊據供稱于賊匪滋擾伏羌時該犯隨從攻城打
仗直至王千戶嶺被官兵圍困始行逃匿後假充
漢人在秦州寧遠等處代人收割田禾潛回被獲
等因除飭該縣迅速妥解俟解到後即行審辦外

至回民馬希成馬重成與馬希中係同族兄弟于該犯從賊逃回即行緝縛送官甚屬畏法臣已飭該縣各賞銀二十兩以示獎勵並飭各該州縣再行選派幹役搜拏餘匪務期盡數就獲毋致一名漏網再四友供出之靈州阿渾王成仁臣節經研訊該犯本係新教阿渾于四十六年當官具呈改從舊教本年賊匪起事後即經按察使提至省城監禁實無從賊情事茲該犯已于司監病斃應毋

庸議奏入

上諭部知之

福康安又奏言查五月二十五日逆回攻擾靜寧州驛路梗阻所有五岱等在伏羌縣拜發奏摺係涇陽驛差人探路步行前經奉

旨令臣查明傳送之人優加獎賞隨即行查去後嗣于七月初一日據陞任按察使陳步瀛詳稱五月二十五日賊匪圍攻靜寧州大路梗塞是日午刻有

護軍統領五岱等在伏羌縣拜發奏事夾板一副
遞至該州城內涇陽驛署知州涂躍龍即選守城
武生厚世昌從北城縋下幫同馬夫王自周探山
步行遞送前途訖等因臣當即宣示

恩旨將武生厚世昌給與行營外委委牌其馬夫王自
周賞給銀二十兩以示鼓勵奏入報

聞

十一月二十八日己卯福康安奏言竊臣前議

奏甘省酌添營汛分設官兵一案欽奉

諭旨以該處地方遼濶究未足以資巡防而壯聲勢令
于該省裁移抽撥之外再准其添設額兵三千名等
因欽此仰見我

皇上厯念巖疆營制務期並壯聲威為億萬載牧寧之
計臣欽遵

訓示通盤籌畫惟在因地制宜俾添一兵即收一兵之
實用庶勁旅星羅疆圉更資捍衛伏查甘省係西

陲要地所設兩提五鎮額兵較他省為多向來重
兵所聚大半在河西不但提督總兵副將駐劄之
處兵數充餘即在各州縣均有兵數百名至百名
不等已數守防無煩再議增添其河東地方惟固
原因沿邊要地上屆添兵案內議將西安提督移
駐添設五營加以城守一營統計額兵三千有餘
已成重鎮至河州控扼番回尤關緊要雖改協為
鎮而親標止有兩營額兵不及二千似猶單弱其

自蘭州以東直至涇州千里而遙均居腹地不免
汛少兵單又省城東北自靖遠鹽茶以至固原所
屬之黑城數百里之內以及省城東南鞏昌秦州
所屬一帶亦因地異衝途稍為輿僻是以設兵較
少亦且墩戍稀疏臣前于善後事宜案內議請于
馬營監添設一營六盤山添兵一汛復于平涼隆
德靜寧莊浪等處添設防兵並於蘭州至涇州大
路登從固原靖遠鹽茶迤至省城各處密安墩汛

計需官弁二十三員兵一千三百四十名即在陝
甘各標營內酌量抽撥官則于簡僻營分裁移兵
則于兵多營分畸零數內裁改在新添之處既可
資防守而壯聲威而在抽撥之營不過裁兵數名
至十數名不等於通局並無妨碍乃蒙

皇上軫念邊防有加靡已令于裁移抽撥之外准其再
添兵三千名自當仰體

聖懷妥協籌議臣查河州原設二營尚未足以壯聲勢

今擬增設城守一營添都司一員千總二員把總
外委各四員兵四百名共新舊兵二千三百二十
名均勻派三營自可無虞單弱至通渭隆德前議
添設之兵計存城不過三四十名誠如

聖諭該處地方遼濶不敷巡防今擬于隆德縣添足兵
一百五十名通渭縣添足兵一百名又靜寧州一
處係在蘭州涇州適中扼要之地西接會寧東連
隆德南控通渭之馬營石峯地方北與鹽茶境內

接壤四達之區實為緊要今擬設立副將營制于
前議設一百五十名之外添設三百五十名共
五百名並添設左右二軍守備將左軍駐隆德右
軍駐會寧以成犄角之勢至靜寧所添副將查有
慶陽協原設副將一員當設協之初係相沿舊制
因慶陽在北路沿邊是以駐劄大員俾資彈壓今
中外一家北邊蒙古均係

聖朝臣僕且慶陽西接寧夏東接延榆均有總兵駐劄

聲息相通似可無須副將營制擬即令該副將帶同
中軍都司移駐靜寧以省添設仍于慶陽改設叅
將一員中軍守備一員管領原有弁兵以符營制
又涇州為入甘門戶秦州系南路扼要之區今擬
于涇州添設都司酌增弁目並添兵九十五名合
之舊設兵一百零五名共足二百名秦州再添兵
一百七十九名合之舊設兵二百二十一名共存
城兵四百名其該州所屬之秦安縣舊有兵三十

名今擬添兵七十名共足一百名並添設千總管
領巡防又馬營監底店石峯堡均屬要地前于馬
營監已議設兵五百名足數防守今擬于石峯堡
安設一汛撥安弁目添駐兵一百名再于底店議
設弁目安兵一百名立營分汛以資彈壓地方聯
絡聲勢又安定會寧均係衝途要地安定舊有把
總一員兵一百名今議再添兵五十名共足一百
五十名即于此內撥安墩汛其會寧舊有把總一

員所管兵止三十名今亦擬添足一百五十名又
鹽茶同知駐劄之海城前議于附近之西安州營
撥千總一員帶兵三十名防守今兵數既有數餘
擬于該處專設千總一員即以西安州營之千總
移駐添設兵一百五十名其前議撥防之兵三十
名仍撥還西安州則兩處均為有益其他如金縣
伏羌西和寧遠漳縣莊浪華亭靈臺鎮原崇信徽
縣成縣禮縣清水兩當等十五處舊有之兵多不

過五十名少者二三十名至十五名十名不等均屬短少今議于伏羌金縣莊浪各添足兵一百名其餘各縣均添足五十名再如瓦亭驛馬家堡黑城白水鎮安國鎮李旺堡孟家墩唐家川等處或在大道衝途或係僻處要區今擬酌添新設兵目五十名至一百五十名並酌添弁目管領因地制宜均資彈壓再臣前議添兵一千三百四十名即將陝甘各營兵丁零數抽撥此內有河州秦州鞏

昌階州洮州岷州舊洮文縣成縣等營抽撥兵共
一百二名茲蒙

皇上于抽撥之外當添三千名兵數儘屬寬餘臣復查
河州等處均屬緊要之地且現在秦州河州暨鞏
昌所屬地方內即有議添之兵似未便于前項各
營內抽裁擬請仍還原數停止抽撥其所缺兵丁
即在新添兵內撥補計此案添官弁五十九員除
裁移昌將一員都司一員千總一員外實添設參

將一員都司二員守備三員千總十一員把總十
一員經制外委二十八名其額外外委即在兵數
之內又統計前議抽撥此次加添兵數共有四千
二百三十餘名得此數千勁旅增入額兵較少之
各營縣則自省城東路以至涇州北路靜遠鹽茶
以迄固原暨南路河鞏秦階一帶營伍充實墩戍
聯絡計通省河東河西地方處處有兵星羅碁布
藉資捍衛邊陲可保金湯永固矣除將酌添官弁

分設兵丁管轄營制咨部外仍另繕清單並繪圖
貼說恭呈

御覽俟

命下之日即行召募壯健兵丁充伍但係新募之兵技
藝未嫻全賴將弁管教訓練除舊制各營員弁本
係熟手飭令用心教習其新設營汛弁目亦俱生
手自應即在附近標管內選擇熟練之員調補以
資訓練奏入

上諭原議大臣議奏旋經議覆均應如所奏辦理
上從之

欽定石峯堡紀畧卷十九

欽定四庫全書

欽定石峯堡紀畧卷二十

十一月二十八日己卯福康安奏言竊臣前准哈密喀什噶爾辦事大臣咨拏獲靖遠縣逆犯馬四輩子沙重文胡剛之親屬馬奉舉沙一珍沙重武胡魁胡鰲等又伏羌縣稟報拏獲馬希中一犯俱解省歸案審辦茲據陞任臬司陳步瀛新任臬司汪新將解到各犯逐加研訊據馬希中供認賊人

攻擾伏羌將該犯裹脇從逆曾經隨同與官兵打仗兩次後賊衆為官兵所破畏懼逃匿茲于十月初七日潛回本處被族人綁縛送官等語又據馬奉舉等五犯僉供該犯等均係出口謀生並不知伊子及伊兄弟在籍隨同謀逆情事但係律應緣坐之犯應均請即行正法臣覆加提訊屬實查馬希中一犯隨同逆匪抗拒官兵後因賊敗潛逃希圖漏網今經縛送自應立正典刑至馬奉舉等五

犯既據供明實係逆犯之父暨同胞兄弟雖不知情俱應緣坐當即派委按察使汪新臣標中軍副將王彙將該犯等綁赴市曹按名正法訖奏入上諭部知之

十二月初八日己丑福康安奏言竊臣據安定縣稟報續獲逸賊馬名正馬名忠二犯當即飭令解省審辦嗣據靖遠縣稟報續獲竄匪張三娃子一犯並准塔爾巴哈臺烏什烏魯木齊等處拏獲逆

犯親屬黃宣哈禮鐵阿都子鐵印哈明穆守榮妥
江妥六十五劉天俸馬宗馬中相馬呼腮子等犯
押解來甘又據安定縣詳報續獲應行緣坐犯屬
馬二娃子車哈娃子馬英馬七十一傳有王六娃
子等犯陸續解省經臣飭司審訊茲據臬司汪新
訊明馬名正馬名忠張三娃子三犯供認被賊裏
去給與號褂腰刀矛子隨同屢次打伏後因賊人
殲滅畏懼潛逃先後被拏等情又據訊明馬二娃

子車哈娃子馬七十一鉄印王六娃子係已正法
逆犯馬金昌車朝禮馬世林鐵光保王成之子馬
英傳有馬中相哈明馬宗係已正法逆犯馬如庫
傳見瑚馬有哈舍兜巴馬拜拜子之父黃宣鐵阿
都子妥江係已正法逆犯黃彩鐵文花妥成之胞
弟哈禮馬呼腮子劉天俸穆守榮係已正法逆犯
哈文馬有劉天眷穆昇貴之胞兄妥六十五係已
正法逆犯妥成之胞姪均屬律應緣坐稟請即行

正法前來臣覆加提訊屬實查馬名正馬名忠張三娃子三犯隨賊屢抗官兵法無可貸其馬二娃子等一十八犯雖不知謀逆情事但既係逆犯之父子胞姪胞兄弟均應緣坐隨委按察使汪新臣標中軍副將王彙將馬名正等二十一犯押赴市曹會同監視行刑訖奏入

上諭部知之

同日福康安又奏言竊臣欽奉

諭旨令將逆回經過地方所有被焚廟宇神像量為修葺粧塑等因欽此臣伏查賊回所至焚掠村庄並敢燒燬廟宇殘損神像實屬罪大惡極自速刑誅臣於軍務告蒞後即飭令各該州縣查明城鄉被燬廟宇除有關

祀典者亟應詳請修建外即民間廟宇有被賊焚燬者亦應量為繕葺其神像殘燬者重加裝塑甘省邊陲僻地民間廟宇規模本不閎壯修葺較易為力

現已一律完整奏入報

聞

十七日戊戌福康安奏言竊自七月內軍務告竣以來臣時時諄飭地方文武加意稽察多派兵役搜查餘匪如有竄匿之犯即行拏獲毋得稍存疎懈嗣據署隴西縣知縣杜夢錫稟報該縣張家營地方拏獲逸賊安定縣回民張談一名復據靖遠協副將袁國璜署靖安縣知縣王賜均稟稱于該

縣羊稍兇地方拏獲賊匪馬守山一名訊知尚有
同逃之犯馬倉藏匿南山內袁國璜即同派往靖
遠一帶巡緝之署遊擊德昌押帶馬守山跟踪查
緝至山僻處有一窑洞據馬守山指稱即係該犯
同馬倉藏匿之處該犯因出外覓食被拏其馬倉
現在窑內隨督同兵丁進窑擒拏馬倉即持棍迎
撲出窑拒捕當被兵丁路榮額外外委范廷貴用
矛扎倒旋即斃命割取首級同木棍一併呈費前

來臣驗明首級仍令帶回原處梟示並將獲犯馬守
山同隴西解到賊犯張談飭發臬司審訊據該司
稟稱訊據張談供認在馬家河經賊人糾約入夥
隨在賊營熬茶做飯並未隨同打仗後因賊敗逃
至隴西即被拏獲又據馬守山供認在糜子灘從
賊隨至鷹窩石白楊嶺等處與官兵打仗由亂草
灣渡河逃避潛匿山溝被兵役拏獲等情臣覆訊
無異查張談馬守山二犯或為賊服役多日或隨

賊抗拒官兵均係從賊之犯法無可貸隨即委按察使汪新會同臣標中軍副將王暈將該二犯綁赴市曹監視行刑訖奏入報

聞

五十年正月十三日癸亥福康安奏言竊照陝甘二省回民較多仰蒙

聖澤涵濡以養以教均沾

丕冒鴻慈自農工商賈而外多有食糧充伍並且中式

武科者恭惟

聖主一視同仁漢回並無岐異惟是回民習武者多而習文應試之人甚少臣竊以含生負性秉賦無殊當使沐浴詩書通知禮義馴其桀驁之氣即可化其頑梗之風則教導回民洵為善後之要務臣自蒞任以來即通飭各屬每於朔望召集回衆同漢民一體宣講

聖諭廣訓俾知孝弟睦婣並令廣設義學延師課讀藉

以化迪恩碩近據回民貢生馬有麟赴臣衙門具
呈請設立學校以資教讀臣即面加獎勵准令設
立扎飭地方官一體實力奉行庶幾迎其好善之
機導以向化之路且使上進有階自必更為踴躍
茲據署循化同知達桑阿稟稱該廳所管沿關一
帶漢民回族戶口日繁從前河州廳移駐循化時
考試一事未經議及雖准令赴州一體應試但該
處距河州寫遠有隔至五百餘里者往往憚于遠

涉漸廢讀書無志上進回族見漢民如此更無由
觀感職因公下鄉見童稚中頗有俊秀可以造就
成材隨增修義學延師教讀數月以來不但漢民
踴躍即撒拉爾回族亦多有樂從苟能迎機引導
自成禮義之鄉似應于循化地方專設學校添置
教職一員以司董率每逢歲科考試由廳錄送文
童酌予取進名數俾知榮顯以策後效將見茅檐
蔀屋絃誦成風即回族民人莫不仰

聖化覃敷漸摩從善似于地方風俗有裨等情臣伏思
我

皇上誕敷文教雖新疆塞外亦已比戶絃歌況循化廳
近隸蘭州該處漢回民人漸濡

聖化百數十年祇因從前未經專立學校教導不先以
致愚民無由觀感自圖上進今該署同知所稟自
屬化導愚頑之意自應准其添設學校以資訓迪
查乾隆四十三年口外瑪納斯縣丞改設綏來縣

知縣案內議准專設學額歲試取進文童四名武
童四名科試取進文童四名俱歸本學管教並建
立

文廟裁撥訓導一員移駐董率等因在案今循化廳
添設學校應請照綏來縣之例歲試取進文童四
名即于內地州縣學額內酌量抽撥嗣後人文漸
盛再為請增如試卷不能足額寧闕無濫並請添
建

文廟以彰文教至應設教職查河州儒學原設學正訓導各一員擬請將訓導裁撥移駐以資董率奏

入

上嘉之

二月初五日乙酉福康安奏言竊照乾隆四十六年大學士公阿桂等籌議甘省善後事宜條款內開各處回民凡已習新教者俱仍改從舊教並不許稱阿渾名目於回民內揀選老成之人令其充

當鄉約隨時稽查如有復倡異教者即行首告指
拏如該處實無新教每年年底令鄉約等聯名具
結一次彙齊咨部查核等因經部議覆准行歷年
取結報部在案臣伏查立法稽查取結具報原為
綏靖地方起見如果實力奉行認真稽察何至去
年復有逆回滋擾之事可見從前取結咨部竟屬
故套相沿具文塞責茲於乾隆四十九年年底據
甘肅按察使汪新呈據各該道府轉據各屬申稱

查明現在並無邪教回民妄稱阿渾名目亦無添
建禮拜寺取具切實印甘各結加具印結照例詳
請核咨臣竊以立法宜嚴尤貴行之以實惟有督
率司道諄訓各地方官隨時隨事加意稽察如有
陽奉陰違者立即查拏辦理如果能實心察辦杜漸
防微則各鄉約咸凜奉公衆回民均知畏法較之
取結更有實濟若因地方無事稍涉寬弛則雖紛
紛具結亦止沿習虛文仍無實效臣不敢虛應故

事徒以一咨塞責惟有凜遵

諭旨隨時實力稽察有弊必覺有犯必懲以仰副

聖主綏靖邊陲之至意奏入報

聞

初六日丙戌福康安奏言竊臣欽奉

諭旨據俞金鰲奏從前陝甘兵丁平日皆預脩乾糧一

遇征調即可尅期起身自平定準噶爾回部之後遂

因循不復儲備等語兵丁乾糧自應平時籌辦以備

急需着傳諭福康安即留心妥辦以復從前舊制等
因欽此臣檢查舊案乾隆初年署寧遠大將軍查郎
阿條議戰兵之設原備隨時調遣之用一遇調遣
須立即起身則裹帶之物均宜預備收貯請每兵
各備乾糧一個月交該管將備收存該提鎮不時點
驗仍恐不便久貯應令半年更換一次將舊貯者
領回食用等因具

奏經戶部議覆准行在案是陝甘各營向來原有儲

備征兵裹帶口糧之制嗣因平定準噶爾回部以後日久因循遂停預備今荷

聖明指示自應妥為籌辦以復舊規惟是舊議每兵一名預備粟米一京斗白麵炒麵各十二斤八兩以為三十日口糧臣竊以裹帶粟米如無薪水之處不能為炊不如炒麵一項即可拌食無須炊爨且設有軍需之事早則數日遲或半月自當安設糧臺若每兵裹帶一月口糧計一人攜帶三十斤以

千人合計即有三萬斤勢必于軍裝馱載之外復添輜重殊形累墜不便進行茲酌議每兵備貯炒麵十五斤足供半月之糧令各該營核明移交駐劄及附近州縣即在倉貯麦石內支結營員磨炒成熟各製口袋標記本兵姓名收貯軍庫所有磨工柴炭及製辦口袋等項均准于公費內開銷仍按季更換給散各兵即以抵應得月糧如有收藏不謹以致霉變不堪食用者即着落經管營員賠

補母許抑派兵丁承領仍即陸續辦製出陳易新
源源積貯設遇調遣立時攜帶起程即倉猝未設
糧臺而征兵亦不虞枵腹矣但既籌出征裹帶之糧
尤須先有訓練備戰之兵臣查陝甘邊地巖疆原
屬重兵所聚嗣因節次裁移兼派屯防口外以致
實兵較少先於乾隆四十六年遵

旨添兵一萬二千七百餘名近復仰蒙

恩旨賞添兵三千名現在添營設汛碁布星羅行伍更

為充實伏念

國家養士卒原期有一兵即收一兵之用無論馬步
均屬可戰之兵惟是兵多貴精正當于養兵不用
之時挑選壯健勤加訓習督撫提鎮各標俱有精
練之兵多者二三千少者亦不下千餘名一有調
發即可帶領遄征尤為預備不虞之計即以蘭州
省城而論臣標五營額兵三千名除額此外委及
各營字識均在額兵數內又有派往口外屯防其

實在撥兵共二千七百四十九名加以城守營現
在兵五百三名此內城守營兵分派墩汛堆撥及
每日押解遣犯護送餉鞘等差計不敷用尚須由
臣標五營兵內撥協又自臣衙門暨各將弁署內
均有該班兵丁統計撥役應差者共湏七百數十
名計此外別無差使可以常川訓練者已挑出二
千餘名勤加操演即該班之兵每日在署仍可親
試技藝隨時訓練其看守堆撥亦係輪班每于下

班之日不廢操演其應差兵丁差竣仍令歸伍演習則此數百名亦屬可以備戰之兵至揀演之法臣查向來綠營陣勢止係兩儀四象方圓如式此皆傳自前朝相沿舊樣平時較閱雖屬可觀臨敵打仗竟無實用自不若京營陣式講肄精詳即如九進十連環等勢果能演習嫻熟施之行陣實堪克敵奏功臣去年抵省後即仿照京營健銳火器等營陣式摹送提臣轉發標營各鎮屬一體照錄

存營如式演習改去故套以收實用再如演習連環原為臨陣擊賊之用乃綠營兵丁平日演放帶藥不過數出藥盡而止設遇臨敵之時敵未退而藥已盡何能制勝臣操演省標各營鳥鎗連環不許拘定出數惟令多帶火藥演放其應否停止悉聽臨時號令庶兵丁演放之際不能預定出數多寡閱時長短雖平常操演亦如戰陣之時積久純熟可免臨時生疎又綠營施放鳥鎗均係膀根不

能挂住鎗靶有似開功之勢過於高仰以致不得
準頭且臨陣之時未見賊而鎗已亂放及賊至而
藥已將盡更復慌張尤非紀律此皆將弁偷惰因
循未經認真訓練之故臣嚴飭各營如法教演期
于發鎗之勢合式可以盡得準頭鎗不虛發嫻習
于平時庶不致倉惶於臨事其各兵內習弓箭者
打鳥鎗者演習馬上鎗箭者令其每日各照所習
之技在各營分操逢五之期各營合在一處比試

為小合操逢十之期為大合操除肆式各項外即
操演九進十連環之陣臣親往較閱即以兵丁之
優劣驗將弁之勤惰分別懲賞雖值寒冬不令停
止並酌量如提鎮標之大小令其挑出備戰之兵
自二千名以至一百名不等西安將軍標撫
標亦酌定兵數均照臣標認真操練常無間斷務
俾技藝盡屬精嫻計將軍督撫提鎮各標共可得
兵二萬餘其各協營路額兵多寡不等今定以兵

數在三百名以上者即挑出一半勤加搯練計又
可得兵萬餘合之兩省足有三萬餘訓練精嫻一
呼即集之兵將兵丁花名及帶兵將弁註定冊籍
由各營送臣查驗如有兵丁事故及技藝生疎者
即行裁汰于冊內開除另挑勇壯入冊補額仍將
各營將弁預為派定不派別差專意訓練練兵之
員即領兵之員使與兵素相嫻習不致臨時兵不
顧將將不識兵並令教演兵之員弁將部頒遵

旨酌擬行軍紀律數條時時告誡提撕俾知臨陣退縮者欲惜命而不免刑誅奮勇爭先者雖捐軀而終膺卹賞庶幾軍律嚴明人懷果銳一變綠營怯懦之習俾三萬人咸成勁敵即此三萬之外不在挑選備戰數內者仍飭隨時實力揀演不令技藝生疎期于無一非可用之兵至軍興之際備帶軍械火藥帳房馬匹均關緊要在衝鋒陷陣之兵勢難兼顧必須另兵經管俾免分心此項兵丁亦應早

為派定若干另造一冊將所管軍械鉛藥及看守
帳房牽喂馬匹各差使于每兵名下註明亦送臣
衙門查核設有緩急均可按籍而稽朝調夕發不
虞遲滯至挑兵入伍之始尤為喫緊查綠營積弊
凡有年衰技劣之兵輒事姑容佔額糜餉迨出缺
挑補時又復瞻徇情面以幼丁濫充更為惡習臣
抵省以來遇有臣標兵缺必親自驗補並移行各
提鎮一體親驗拔充仍令嚴飭所屬各營員將舊

存老弱兵丁全行草退另募年力精壯漢仗高大
之人頂充無許徇情濫補其拴養馬匹尤須飼喂
飽騰牧放得地毋得尅減草料缺額疲瘦臣不時
派妥員查驗如有前弊即行據實嚴叅再臣查行
軍之法既有勁兵尤資利器乃外省綠營一切軍
械均非利用雖年年查驗無虧仍不免有名無實
即如鎗鞘多係松木製成外用硃油徒事飾觀而
木質鬆脆不能堅久臣前在軍營中見鎗靶一經

磕碰即有損壞當臨敵之時損壞一桿即少一鎗
之用且鎗靶火機製造均不能合式以致兵丁施
放不能合手臣已另給式樣妥為置造並將鎗鞘
改用榆木不施油漆期于朴素堅緻施放便利又
如砲位演放不勤即易銹鈍兼且砲手生疎一時
不能得準至弓久張而不弛必致筋角鬆懈箭久
放而不端必致灣曲撒放之時豈能及遠又如刀
矛鑄造不精鋒銛挫鈍何能殲敵烏鎗日久不洗

必致火門澁滯豈能擊放迅捷似此武備廢弛雖有器械猶之徒手也臣自幼直侍

內廷夙蒙

聖主教導訓示又曾在軍營學習行走今存歷封圻重寄兩省營伍均係臣之專責何敢稍事因循致負我

皇上整飭戎行之至意惟有隨時查驗勤加講習力為整頓總期兵精器利人器相習庶幾一兵收一兵

之用至各兵丁衣甲器械之外其靴鞋亦須製備
遇有山路崎嶇或雨後泥濘脚齒亦應預備俾資
輕便過行再軍營遇雨事屬尋常全在禦雨之具
籌備齊全便於攜帶若當乘機進勦之時或因雨
濕軍裝逗遛烘烤坐守機宜去年剛塔在馬家堡
之事可為明鑒臣已飭各營務將各項營械預製
櫬雨油袋妥為備辦庶免臨時周章以上添置各
項之費或即歸入現在補製帶缺軍裝案內通融

辦理或在各營公費銀內支銷至如火藥鉛丸尤
關緊要臣前在川滇時各處均有備貯火藥三年
五年不等自抵甘陝通查各營其足備三年之處
甚少加以去年勦賊復有耗用現在移會各提鎮
查明實貯之數悉行通盤籌脩奏入

上命軍機大臣傳諭福康安各省總督兼管營務之巡
撫曰據福康安奏儲辦征兵裹帶並挑演脩戰兵丁
一摺所辦甚是已令軍機大臣核議行矣國家設兵

衛民兵可百年不用不可一日不備陝甘兩省係邊
陲要區設兵不為不多乃逆回兩次滋事綠營兵丁
怯懦退縮致賊匪得以蔓肆鴟張又從前山東王倫
一案均由京簡派八旗勁旅令大臣帶往督辦勦捕
方能迅速翦除此皆承平日久督撫提鎮不能實心
整飭各營將弁不加操演講習因循怠玩以致兵備
廢弛屢經降旨嚴切訓飭若能如福康安加意整頓
於各標營內挑出兵丁一半專意訓練俾軍律嚴明

士氣勁銳一變綠營怯懦之習兩省共有三萬餘勁
旅設或地方稍有不靖又何患不立時撲滅耶在雲
貴四川兩廣福建等省係沿邊沿海重地自應照福
康安所辦於各營內挑選壯健勤加訓習使各有數
萬勁兵庶平時可以重操防而臨事可以供調遣即
腹地亦當如此留心簡練各省皆係總督專主營政
而山東河南山西江西係巡撫兼提督銜著將福康
安原摺抄寄各省總督及山東山西河南江西巡撫

一體留心不動聲色皆有精兵之備亦一政要也

同日福康安又奏言伏查此次逆回遺存房產前經臣會同大學士公阿桂遵

旨籌議先儘被難民人認買再及別處居民如甘省民人承買之外尚有餘剩房產即令附近甘省之陝省民人認買但被難貧民諒不能遽有餘資交官還值擬准將所估價值分季攤交至此外民人如有不能一時交清價值者亦准分年帶交應與難

民稍示區別俟招買時臣福康安再行酌辦飭令各該地方官據實查報茲查鹽茶靜寧隆德華亭伏羌通渭安定靖遠莊浪等處十五廳州縣抄獲逆產共山川水旱荒熟地五萬一千四百三十三畝六分零瓦房土房共三千八百三間土窑六百一十五處又拆毀禮拜寺七十三間此項房產自出示招買以來具呈認買者尚屬寥寥蓋緣甘省地瘠民貧有力之家本少無論被難民人仰賴

聖恩賑卹得免饑寒瘡痍乍復即未經被難人戶均鮮
餘資無暇遽謀新產若過於催督恐地方官辦理
不善或致抑勒派買轉多一番滋擾殊非仰體我
皇上惠卹邊氓之至意且以無力之人強為承買價值
仍不能清交則

帑項亦終多懸宕臣現在諄飭各屬徐為招諭妥協
經理已將此案房產田畝仰蒙

聖主格外鴻慈減價售變並許分年帶交緣由明白出

示通行曉諭計小民貪得便宜將來自必爭先承
買至臣

奏分年交價之處詳加籌酌請將前項房產仍照例
核估不得預為短少致滋欺弊但于民人認買之
時明示酌減如係被難民人承買者照估定價值
許減十分之三
分作五年攤交此外民人承買者
減十分之二
或有一時未能清價亦准分作三年
帶交並令接壤之陝省民人一體承買分年帶交

如此分別辦理期於踴躍爭售房地可不致久懸
查自去冬臘月以來節據靜寧州等處具報歸籍
貧民百數十戶查明均係賊氛之始聞信驚逃或
先在他鄉傭工趁食迨事後旋歸室廬焚毀生計
蕩然情殊可憫臣於撫卹銀糧之外復自捐廩給
予並飭令該地方官妥為安插即於入官房屋內
量撥棲身據伊等即情愿認買臣復議酌撥地畝
令其承佃即可將所收花利按年依限交價似于

售變房產之中即可寓加惠灾黎之一法嗣後承
售之人源源踵至邊氓均荷

聖主鴻慈減價寬限立產安居益感戴

皇仁於靡既矣再現在籌議添兵案內應建營署兵房
擬將入官房屋撥給兵丁居住或拆移修葺衙署
以省工料之費臣現俱分別酌核辦理奏入

上諭如所議行

初八日戊子福康安奏言竊查逆回滋擾焚掠村

庄其州縣鄉倉糧食亦間有被焚者先據通渭縣
詳報馬營監安遠鎮二處鄉倉被焚又據華亭縣
詳報所屬白巖鎮鄉倉被賊燒燬臣抵任後即飭
藩司查明該二縣鄉倉被焚厰座間數應否建修
並燒過糧石內有無堪用之糧據實盤驗造冊覈
報去後茲據藩司浦霖詳稱查得通渭縣馬營安遠
二處被賊焚燒倉厰三十二間原貯倉斗糧共五
千八百七十五石零內盤驗堪用倉斗二千七百

七十一石零實在燒燬糧三千一百四石零至該處被焚倉廩除安遠鎮距城寫遠往返稽查本屬不便應請毋庸建修外其馬營監居民稠密設有鄉倉出納稱便且現在設營添駐弁兵可資防範而每年應放兵糧亦可收貯闕支請將安遠鎮被燬倉廩一十間馬營監被燬倉廩二十二間共三十二間統歸馬營監一處建修以資脩貯又查華亭縣屬之白巖鎮原有倉廩二十間存貯倉斗糧

二千五百七十五石零盡被送回燒燬無存僅于
厰底檢出麥豆一百四十餘石亦屬不堪食用至
該處距城寫遠鞭長莫及所有焚燬倉厰應請毋
庸建修等情造冊具詳前來臣覆核無異現飭將
盤驗堪用糧二千七百七十一石零加謹收貯其
燒燬糧共五千六百七十餘石應請在於冬原款
內作正開銷至被焚倉厰除華亭縣白巖鎮鄉倉
既據該司查明距城寫遠不便存貯毋庸建修外

其通渭縣安遠鎮馬營監二處被焚倉廩共三十間應如該司所請安遠舊有鄉倉毋庸重建統歸馬營監一處建修奏入報

聞

四月初十日己丑福康安奏言臣于二月十五日自省起程前往各處察勘適涼州鎮總兵蘇靈因查閱營汛抵莊浪營屬之紅城地方離省百餘里臣因去年籌議添兵事宜係該鎮隨同辦理頗為

認真是以檄令就近來蘭帶同查勘臣仍會同提
臣哈當阿周歷詳勘酌量地方之險易道里之遠
近隨勘隨商議定規模茲屆事竣旋省理合詳晰
陳明伏念此次添兵設汛乃係

聖主厯念邊陲要地期於營伍充實聲勢聯絡為億萬
載教寧之計就臣識見所及合之目擊情形詳晰
妥籌除新舊各營酌定兵額及營員分駐地方衙
署間數悉照前

奏辦理規模已定其兩次添兵已四千二百三十八名擬請以馬四步四守二作為定額所有新添之兵若全行招募則一營統係新兵教練須時驟難得用且有地處險僻居民稀少之區招募維艱勢將懸缺久待更非添兵之本意是以臣前

奏明參用舊兵按各汛地方情形酌擬用舊兵十分之二三四五六七八不等並有全用舊兵者其原議抽裁零尾兵一千二百三十八名酌擬在甘省

者全係移兵在陝省者分別道路之遠近近則移兵遠則移缺先儘一千二百三十八名之數尚有
不敷即在附近督提鎮大標內撥往令原營照數
另行募補仍將裁移抽撥之處派定營分營數分
晰造冊咨部查核至前議添設各汛尚有應行酌
改者查前議六盤山添安一汛設千總一員經制
額外外委各一員兵一百名令臣復加勘度六盤
山頂地勢窄削難以安營其山腰有廟兜坪一處

地面平坦但多沙石難施夯礮堅築建蓋兵房徒費力而易於坍塌又乏水泉兵馬均難存劄今勘得山之西麓地名楊家店依山扼要地頗寬敞舊有墩塘一座擬改於此處設汛建蓋營署兵房較為妥協但該處西距隆德縣城止十五里今隆德縣已添足兵一百五十名東距瓦亭三十五里亦已添足兵一百名則楊家店無須駐兵一百名之多擬止駐經制外委一員帶兵五十名在彼分駐

已資聯絡聲勢請裁減原議添駐六盤山之千總
額外外委各一員兵五十名仍於山頂安設墩塘
一座汛房五間撥兵輪班巡防又原議孟家墩添
安一汛設千總一員經制額外外委各一員兵一
百名今查此地雖居高憑險但在河州城外不過
里許河州現已添設重兵其孟家墩近在咫尺呼
吸相通只須於孟家墩山頂安設墩塘一座酌建
汛房十間即在河州城守營內撥外委一名帶兵

三十名輪班駐守其原議之千總經制額外外委各一員兵一百名均可裁減再臣勘得秦安縣所屬之蓮花城地居險隘烟戶稠密其附近十數村庄民回雜處較為緊要擬即以六盤山裁減之千總一員外委一員兵五十名移駐巡防又查得河州之定羌驛東通洮河南連狄道西接河州為三路扼要之區前於乾隆四十六年大學士公阿桂等籌議善後事宜案內奏請復設州判分防彈壓

但同城並無武弁兵丁尚未嚴密又狄道州之沙
泥站係河州蘭州要道舊有州判分防而存城兵止
十五名亦屬太單今擬在孟家墩裁減之千總一
員經制額外外委各一員兵八十名移駐定羌驛
尚餘兵二十名即添駐沙泥站以資防守似此一
轉移間與原設弁兵並無增減而於防範地方均
收實用矣至墩塘之設所以盤詰奸匪接遞文報
期於聲勢聯絡如人身之血脈貫通實與營汛相

為表裏自應遠近疎密道里適均又憑高瞭望須擇形勝之區方非虛設今甘省河東地方中路自蘭州以至涇州大道舊有墩塘五十一處其中遠近參差位置失宜者甚多實未妥協又省城東北路由靖遠以達固原迤東北以至下馬關一路墩戍稀疏又東南路鞏秦通渭伏羌莊浪一帶偏僻地方多係崇山峻嶺舊設墩塘更屬寥寥無幾實不足以聯絡聲勢是以臣前兩次籌議由鞏蘭縣

屬三角城至安定會寧添安墩塘八處靜寧州境
內添墩十四處平涼縣境內添墩十七處馬營監
四路添墩十四處固原州東至瓦亭西至靖遠縣
屬之打喇赤添墩二十處靖遠縣至打喇赤東路
添墩六處西路添墩二處又自蘭州至靖遠添墩
十六處又底店四路添墩八處安定境內添墩十
處共一百四十一處先後

奏明在案茲臣親加履勘自蘭州以至涇州九百餘

里係新疆孔道驛站衝途前擬舊設墩塘五十一處之外添設十三處尚覺稀疏今通盤籌度請再加添十九處計程十里或十五里即有墩塘一處巡防更為周密其原議馬營監四路添設墩塘四十處今親勘情形該處西接安定東接伏羌秦安西南接鞏昌東北接靜寧計至四路各交界處所不過百里內外止須分布墩塘二十處已敷巡防接應可毋庸四十處之多擬請酌裁二十處所有

大路加添之十九處即於此內移設又勘得莊浪至石峯堡之間有雙峴山一處頗為險峻扼要應請添設墩塘一處適符所裁二十處之數其餘安定會寧靜寧平涼底店固原鹽茶靖遠皋蘭各境內添設墩塘之處仍照原議數目妥協布置統計仍符原

奏添設一百四十一處之數合之舊有墩塘八十二處共計二百二十三處臣謹繪圖分路詳細粘簽

恭呈

御覽再查大路墩臺塘汎原為巡防亦屬觀瞻所係每
歲年班入

覲新疆伯克人等時有經過尤須示以整齊嚴肅臣於
途次留心察看舊日墩塘規制不能一律又因年
久多有坍塌損殊不足以壯觀瞻自應乘此添建新
墩之時將舊墩普行修改一律整齊鞏固自入境
以達省城千里之內煥然改觀則地方益昭嚴整

尤足壯金湯之色至河西大路各墩塘舊日規模
本為嚴密又屢經修整尚無坍塌之處均毋庸另
為籌辦惟是墩塘既籌添設尤貴有兵常川巡守
向來綠營陋習凡有墩兵均就附近各營搬住遇
有過往差使臨時撥兵支應差過即回本營平日
仍無一兵常川在汛甚至有一兵佔兩兵之缺一
塘兼兩塘之差此項兵丁營中差操則稱現在汛
所及查汛防則又托言調操歸營彼此巧為規避

徒屬有名無實茲臣酌議每新墩一所建蓋土房五間其舊時塘汎兵房一體添蓋足數即以附近標營舊兵撥駐間有在該墩坐落地方及附近村庄招募民人充補者酌量情形辦理每兵一名撥房一間俾携眷安居可以責令常川駐守不得藉稱棲止無所曠汎悞差仍嚴飭該管大員加意稽查如有營弁侵佔名糧兵不足數者即嚴叅治罪務期有一兵收一兵之用即添一墩有一墩之益

以仰副

皇上整飭邊防永期綏靖之至意除現已飭司給發銀兩將前議續添營署兵房墩塘等項尅日鳩工仍責成該管道府會同各營協力督催稽查毋許曠延時日苟簡工程並移咨提臣哈當阿就近常川督察再各該州縣抄存逆回房屋及拆毀禮拜寺木料磚瓦與其減價售變不若即以撥給官兵居住並就近拆移添建仍于題估案內確核聲明奏

八

上諭軍機大臣會同該部議奏旋經議覆應如所奏辦

理

上從之

臣等謹案甘省逆回滋擾自取誅鋤

皇上授鉞重臣先後調集諸路兵及京營勁旅直擣賊

巢不十日間醜類盡殲凶渠生繫伏讀

御製遲速論以先幾立應迅即蕝功統歸於一念之敬

煌煌乎

聖訓昭垂洞古今徹上下而無以易也至逆氛既靜邊

寓牧寧孽匪恣淨根株良氓胥登衽席荷

恩言之賑撫獲比戶以寧居增兵額而重操防廣學校
而興絃誦所以控幅員之遼濶化獷俗之愚頑
者善後章程無一不稟承

睿斷實為萬年經久之鴻模詎惟隴右方隅永資綏輯
已哉

欽定石峯堡紀畧卷二十